

سرى للغاية

محضر اجتماع مجلس الوزراء برئاسة الرئيس جمال عبد الناصر

القاهرة - قصر القبة فى ١٣ نوفمبر ١٩٦٨

الحاضرون

الرئيس جمال عبد الناصر، صدقى سليمان.. نائب
الرئيس ووزير الكهرباء والسد العالى، كمال رفعت..
للعمل، عزيز صدقى.. للصناعة والبتترول والثروة
المعدنية، ثروت عكاشة.. للثقافة، محمد أبو نصير..
للعدل، سيد مرعى.. للزراعة والإصلاح الزراعى،
حسن عباس زكى.. للاقتصاد والتجارة الخارجية،
عبد الوهاب البشرى.. للانتاج الحرى، محمود
رياض.. للخارجية، شعراوى جمعة.. للداخلية، أمين
هويدى.. للدولة، محمد فائق.. للإرشاد القومى، كمال
هنرى أبادير.. للمواصلات، فريق أول محمد فوزى..
للحربية، محمد حلمى مراد.. للتربية والتعليم، محمد
عبد الله مرزبان.. للتموين والتجارة الداخلية، إبراهيم

زكى قناوى.. للرئى، على زين العابدين صالح..
للنقل، أحمد مصطفى أحمد.. للبحث العلمى، السيد
جانب الله السيد.. للتخطيط، حسن حسن مصطفى..
للإسكان والمرافق، محمد بكر أحمد.. لاستصلاح
الأراضى، عبد العزيز محمد حجازى.. للخزانة،
محمد حافظ غانم.. للسياسة، محمد صفى الدين
أبو العز.. للشباب، عبد العزيز كامل.. للأوقاف
وشئون الأزهر، محمد حمدى عاشور.. للإدارة
المحلية، عبد الوهاب البرلسى.. للتعليم العالى، حافظ
بدوى.. للشئون الاجتماعية، محمد عبد الوهاب
شكرى.. للصحة.

المحتويات

الصفحة	الموضوع
١	١- إعادة النظر فى تجنيد المعيدى والمبعوثى
٣	٢- خطوات تشكيل الجيش الشعبى
٦	٣- استكمال حصر الأهداف الحيوية
٦	٤- عبد الناصر.. حل الشكاوى الشخصية من أفراد القوات المسلحة الموجودى على خط النار
١١، ٣٧ - ٤١	٥- بحث ما نفذ من بيان ٣٠ مارس
٢٥	٦- بحث خطة البحث العلمى والإنتاج الحرى
٣١	٧- وضع البعثات التعليمية المصرية فى ليبيا
٣٤	٨- ضرورة التعاون بين وزارة الخارجية والاقتصاد
٤١، ٤٦ - ٤٨	٩- عبد الناصر.. ضرورة البت فى اللجان الوزارية
٤٣	١٠- قانون التعاون وتحديد ميعاد الانتخابات
٤٥	١١- حول سياسة التعليم العالى

سرى للغاية

قرارات مجلس الوزراء

فى ١٣/١١/١٩٦٨

بحث التقرير الذى قدمه الدكتور حلمى مراد وزير التربية والتعليم؛ عن ماتم تنفيذه بالنسبة للبرنامج التنفيذى لبيان ٣٠ مارس داخل أجهزة الدولة. كما ناقش عددا من المسائل المتعلقة بالمسائل العامة للدولة، ومنها سياسة البحث العلمى ودوره فى بناء الدولة الجديدة. ثم استعرض المجلس ما تم تنفيذه بالنسبة لقانون منظمات الدفاع الشعبى. وكانت مشكلة النقل قد وضعت على جدول أعمال مجلس الوزراء، ورؤى بعد أن جرت مناقشة مبدئية فيها أن تخصص جلسة كاملة لمناقشتها بالنظر الى أهميتها، وتقرر لذلك تخصيص الجلسة القادمة لبحث المشكلة.

سرى للغاية

محضر اجتماع مجلس الوزراء برئاسة الرئيس جمال عبد الناصر

القاهرة - قصر القبة فى ١٣ نوفمبر ١٩٦٨

عبد الناصر: قعدت للساعة كام يافوزى؟

فوزى: ٤,١٥ يافندم.

عبد الناصر: قعدتوا فى الأهرام لغاية الساعة كام؟

رياض: لغاية الساعة ١,٣٠.

عبد الناصر: هم اتبسطوا منك فى الأهرام، أمال مابتكلمش هنا زى هناك! (ضحك)

رياض: (ضحك)

عبد الناصر: المعيدىن بتوع الهندسة باعتين لى بيقولوا إنهم هايتجدوا وكنا اتكلمنا فى الموضوع ده قبل كده، وبيقولوا إنهم هايتأخروا طبعاً عن الدكتوراه، كنت قلت لى: إنك هتأجل المعيدىن؟

فوزى: مش كلهم بالتنسيق مع السادة الوزراء، مارفضتش أى طلب المخطط من وجهة نظره على دراسات عليا.

عبد الناصر: لا.. هم المعيدىن الحقيقة لما هياخذ سنة أو سنتين معناه إنى هأخر أقدميته لأنه أقدميته بتبتدى بعد كده من الدكتوراه - ده اللى أنا فاهمه - فمفيش داعى الحقيقة نضرهم.. اللى هم المعيدىن المتعينين.

فوزى: طلبات الوزراء مارفضتش حاجة منهم.

عبد الناصر: وطلبات رئيس الوزراء؟! (ضحك)

سرى للغاية

أصوات: (ضحك)

عبد الناصر: هو لازم أبعت لك طلب؟! (ضحك)

أصوات: (ضحك)

عبد الناصر: وأنا شايف بالنسبة للمعيدين هم بعثوا لى - بعثوا لى مع خالد الحقيقة - جواب وبيقولوا: إن معنى هذا أقدميتهم هيتأخروا فى الدكتوراة، والحقيقة اكتشفت كلام معقول مادام اتعينوا معيدين وعددهم قليل المعيين فبنأجل التجنيد.

فوزى: هانسمح بتأجيل وبعدين مانصطدمش بـ ٢٨ سنة.

عبد الناصر: لما بييجوا ٢٨ سنة يبقى يحلها ربنا بقى، المبعوثين إحنا عاملين نفس العملية وبنأجل لهم يبقى من باب أولى المعيين. وهم الحقيقة كلامهم منطقى لأنه إذا جه هيفضل مجند لغاية نهاية المعركة، فإذا مهواش هياخذ شهادة ولا حاجة وهو المفروض المعيين هم الأوائل مش كده؟

فوزى: ماعدا الطب.

عبد الناصر: ماعدا الطب والأزهر. (ضحك)

هويدى: الطب ليه يافندم؟

عبد الناصر: بياخدوهم.

فوزى: هو دلوقتى إذا كان السادة الوزراء يسمحوا بيعتوا بالاسم.

عبد الناصر: هو التعليم العالى بس.

سرى للغاية

البرلسى: إحنا اتفقنا مع السيد الوزير من السنة اللى فاتت على ٣ مراحل، تلت كل سنة بحيث المعيد الجديد يقدر يروح ويرجع بعد ما يخلص المدة ومش هايجرى حاجة.

عبد الناصر: بس اللى هايروح سنة وهيتدرب لازم هيقعد لغاية نهاية المعركة، مفيش دلوقتى حتى رديف ولا تسريح ولا حاجة لأن اللى هندربه النهارده لازم هنقعه لغاية نهاية المعركة.

البرلسى: وبعدين المرشح برضه للبعثات نفس الحكاية فيه إشكال علشان تجنيده برضه.

عبد الناصر: يعنى تتفاهم مع فوزى علشان الموضوع ده.

كامل: بالنسبة يافندم للمعيدين فى جامعة الأزهر، علشان هى فى فترة تأسيس بنراعى فيها فعلا العدد علشان التعيين.

فوزى: لو سمحتم الأسماء بالاسم علشان يطلع له قرار وزارى.

عبد الناصر: فيه حاجة بالنسبة للجيش الشعبى؟

فوزى: أيوه يافندم فيه الحقيقة بعد ما قعدت ساعة واطمنت إن أنا أقنعت الأمناء واللجنة السياسية والأسئلة اللى جت بعد كده جت بمفهوم إنهم ماستوعبوش القانون كويس، ورغبة الجماهير سبقت مفهومهم من ناحية إن فيه أعداد كبيرة موجودة عندهم عاوزين يواجهوها. أصل القانون يسبق بالإمكانات الذاتية اللى هى بتاعت الشعب اللى هى الأهداف الحيوية، وإن دى لو اتدمرت الشعب كله بيخسر؛ فالقانون حط مبدأ فى إنه يدى هذه العملية أولوية، ومن هنا جت كلمة منظمة الدفاع الشعبى على مستوى المحافظات، هم وراء الجماهير بيغوا شئ أكثر من ذلك.

عبد الناصر: هو كلام فريد عبد الكريم النهارده فى اللجنة السياسية اللى هو الكلام اللى فى المؤتمر، اتكلموا على جيش شعبى على أساس إنه جيش يهجم. إحنا بنقول لهم: إن هذه العملية ماتجيش فى الأول.. فى الأول لازم نبتدى بحاجة بهذا الشكل، وبعدين إذا طال الوقت بتتطور الأمور الى الجيش الشعبى المفهوم.

سرى للغاية

فوزى: صحيح، وبعدين أنا مرضتتش أدخل وياهم فى المفهوم اللي هم عاوزينه لأنه ١٠٠٪ كنت هكرر الكلام اللي سبق قبل كده فى المؤتمر الأول للاتحاد الاشتراكى.. المؤتمر العام، هذا اللفظ طالع منه.

عبد الناصر: هو إحنا الحقيقة لازم برضه نفهم الناس إن الجيش الشعبى زى مثلا الموجود فى فيتنام الجنوبية أو زى اللي كان موجود فى الجزائر. يعنى إحنا الحقيقة موضوع زى الجزائر إحنا اشتغلنا فيه من أول دقيقة.. إحنا اللي اشتغلنا فيه، هم مايبتكلموش على هذا دلوقتى! وأما أنا روحت الجزائر بن بيلا اتكلم بصراحة فى هذا الموضوع فى خطبته. وابتدينا مفيش حاجة يعنى العدد القليل وفضل يكبر يكبر وابتدينا نودى سلاح وابتدينا نعمل عملية. فأى عملية بتبتدى فى الدنيا مش ممكن تبتدى كبيرة لازم تبتدى صغيرة، وهذه المنظمات إذا ابتدت واتدربت وبعدين عملية الجيش الشعبى عاوز تدريب سياسى وعسكرى درجة أولى.

فوزى: قلت لهم يافندم: إحنا مع العدو كنا أكثر منه عددا وأكثر منه تسليحا بس كان ناقص لنا نقطة أخرى اللي هى المقدرة القتالية؛ يعنى الفرد كان موجود بيندقية على الكوبرى، طلع رصاصة واحدة؟! مطلعش! المسألة مش مسألة بشر ولا تسليح بقدر ماهى رفع مستوى قتالى للفرد. ودخلنا فى أمور تانية من ناحية جدية لسه لايحة تنظيمية هنتظمها؛ اللي هو التطوع ناس منهم أيدوا فى الفرد اللي هو مؤمن ساسيا أفضل من الفرد اللي سبق له الخدمة فى القوات المسلحة، ودخلوا فى موضوع التفرغ هل الفرد ده هيكون متفرغ ولا لا؟ وأنا اقتترحت موضوع إن السلاح الواحد ممكن يشتغل عليه ٣ - ٤ أفراد كل ما زودنا عدد الأفراد المدربين، ويأخذ خدمة ٤ ساعات بدل ٦ - ٨ بس ينبع الدفاع من أصحاب الشأن من المؤسسة من الشركة من المصنع، دول أولى من ناس آخرين يجوا من الخارج الى داخل المحافظة. وركزت على كلمة اللامركزية، ما حد هايقدر يحمى الأهداف الحيوية فى قنا إلا أصحاب الشأن فى قنا، ثم دخلنا فى نقطة أخيرة نزاع شكلى ما بين الإختصاصات بتاعة الهيئات. والاتحاد الاشتراكى ضغط فى أن يكون صاحب الشأن فى انتقاء وانتخاب الأفراد؛ الناحية دى مكانتش ظاهرة فى القانون، فأنا وعدت بإنى أحط الهيكل بتاعها ومع وزراء الحكم المحلى والداخلية والاتحاد الاشتراكى، وينقدر نخرجها بشكل يرضى الجميع، التعاون لازم يكون ظاهر فى هذا الشأن لأنه كل واحد عنده الإمكانيات.

سرى للغاية

عبد الناصر: هو المهم الناس مايجروش، وده يستدعى تدريب الحقيقة وتطعيم للعملية لأن اللى ماشافش ضرب رصاص أول ماهينضرب رصاص هيجرى.. هى العملية كده! هو الفرق بين روح القتال وعدم روح القتال إن واحد يجرى وواحد مايجريش.. يعنى دى العملية. فالحقيقة إذا كترنا العدد ممكن رصاصه واحدة تجرى العدد ده كله، إن شاء الله يكون ألف أو ألفين أو عشرة آلاف برصاصه هيعملوا للخلف دور ويجروا! الحقيقة بنبدى بعدد صغير وندريب كويس ونعمل لهم إختبارات وبعدين نتوسع، وإلا إذا كان الناس هيجروا يبقى كل اللى بنعمله مظهرية وإحنا مش عاوزين المظهرية.

فى الصور برضه زى اللى ماسكين سكاكين، بيقلوا: القتال فى المياه! فى الصور اللى أنا شوفتها دى عملية هجص، الحقيقة الواحد لما يشوف الصور دى ببيان إن هى عملية تهريج أكثر منها! فالحقيقة وبعدين الوكالات نقلت الكلام ده بره وبعدين الناس بيضحكوا علينا! واليهود فاهمين كويس قوى لأن عندهم معلومات عننا من الأمريكان. والأمريكان هنا عندهم معلومات كاملة، والعملية الأولانية لما راح وقالوا إنهم هيهجموا، راح جونسون وجاب رئيس هيئة الأركان وجاب رئيس المخابرات وقال إنهم ممكن يكسبوا المعركة.

فوزى: وبعدين التجارب السابقة بتاعتنا تدينا وعى. برضه الحرس الوطنى ٩٥ ألف كجيش احتياطى من ١٥ مايو الى ٥ يونيه.

عبد الناصر: يعنى جبتوهم بدون تدريب!

فوزى: آهى تجربة يافندم ماعملهاش تانى! هى كانت على يدى وكل واحد خد منهم بندقية ومكانوش يساواوا شئ! وبعدين تجربة حديثة بتاعة المقاومة الشعبية فى السويس استهلكوا ٨٠ ألف طلقة فى ٤٥ دقيقة! كل دى تجارب ماتقوتش على الواحد كده؛ يعنى المسألة لازم تتبنى على أسس علمية كويسة وتتأخذ خطوة خطوة.

عبد الناصر: يعنى يكون الهدف من الناس إنها توقف ما طرحها وما تجريش، وبعدين فى نفس الوقت نعمل عمليات دفاعية عشان الموضوع زى بتاع نجع حمادى ما يحصل مرة ثانية بالنسبة للعمليات الأساسية، ونبتدى.. نبتدى ونمشى وده بيخلينا ننطلق ونوصل للى احنا عاوزينه.

سرى للغاية

عاشور: تسمح لى يافندم، يهمنى إن أنا أدى صورة واضحة عما تم خلال الأسبوع اللى فات. أنا وصل لى إمبراح تقرير نجاح من المحافظين كلهم بعد أن قام كل محافظ بحصر الأهداف بتاعته فعلا، وهناك بعض المحافظات الأخرى وافتنا ببعض الأهداف الحيوية زى مثلا محطات الصرف، وبالليل الساعة ٧،٣٠ وصل لنا محطات السكة الحديد بالذات. الخلاصة، إن مجموع الأهداف اللى فى الجمهورية كلها ١٢٤٦.

عبد الناصر: زادوا ٢١٠ عن الجلسة اللى فاتت!

عاشور: زادوا عشان محطات الصرف، بناء على توجيهات سيادتكم جنبناها كلها ٢١٥ محطة فى الجمهورية كلها، وقسمناها الى ٤ أسبقيات ٢٧ أسبقيات أولى و٥٦ و٥٨ و٧٤. أنا باتصالى مع السيد وزير الحربية وافتنا إنه هياخذ أكثر من ١٠٠ غير محطات الصرف، وقسمنا باقى المرافق والأهداف الى أسبقيات، وأصبح فى التخطيط لكل عملية أسبقيات للمرحلة الأولى. والنهارده عليها حراسات من الشرطة ولم يقم أى استدعاء الآن؛ لأن فيه بعض الشروط فى الاتحاد الاشتراكى حول الاستدعاء. كل ده هايتفق عليه، واعتبارا من يوم السبت هيصل المتطوعين، لكن الفكرة إن المعسكرات ليها بعض المشاكل الأخرى.. المديرين وكل ده نرجو فى الأسبوع القادم نكون حليناها واتفقنا على الاستقبال فى خلال ١٥ يوم.

الدفاع المدنى ماشى جنبنا الى جنب وكان فيه اقتراح.. إجماع السادة مديرى الأمن، ونعتقد إن المحافظين كلهم فى الصورة وفيه تنسيق كامل بين الدفاع المدنى وبين المنظمات الشعبية.

فوزى: نفذت قرار سيادتكم بتاع يوم الأحد، بعث طقمين نص بوصة قناطر إسنا ونجع حمادى وأسيوط.

عبد الناصر: أه.. طقمين لكل..

فوزى: طقمين لكل واحدة.

عبد الناصر: بالنسبة الأكل فى القوات المسلحة، وأنا الحقيقة جالى شكاوى كثير من العساكر بإن الأكل مش كفاية، وأنا سألت أول إمبراح لما كنت هناك وقالوا لى: إن الأكل مش كفاية! فهو الحقيقة لازم نحل هذه المشاكل وإلا برضه مفيش فايده. وبعدين سألت قالوا: جم الدكاترة

سرى للغاية

وعملوا السُّعرات والحاجات دى والعسكرى مايهموش السُّعر، هو عايز بطنه تتملئ ما حناش بناكل بالسُّعر؛ فالعملية كمية الأكل سواء عدس أو فول أو لوبيا أو فاصوليا تبقى تكفيهم. وبيقولوا إنها تتكلف فى الشهر ١٠٠ ألف جنيه، وأنا فى رأى إن ده مبلغ بسيط جدا وأنا موافق على الـ ١٠٠ ألف جنيه ولكن حاسس إن الأكل..

فوزى: سيادتك تجاوبت على الامتلاء يعنى؟

عبد الناصر: أه.. طبعا.

فوزى: الزيادة ٢٠٪، إحنا بناكل بـ ١٢ مليون جنيه فى السنة فعاوز ٢ مليون.

عبد الناصر: ٢ مليون! يعنى الحقيقة مفيش فايده، وبعدين العساكر اللي واخدينهم من المتقنين خريجي الجامعة؛ يعنى أنا بعرف ناس أمهاتهم بيقولوا: إنهم مايشبعوش، وواحد منهم بيقول: بيدونا الصبح ١٢ فولة فى الطبق.. عدهم! وقطعا فيه سرقة ولازم فيه سرقة فى العملية بالعملية مش كفاية، ومعرفش هم بيصرفوا مكرونة؟

فوزى: أيوه يافندم.

عبد الناصر: بيقولوا عملوا مكرونة نص الناس خدت ونص الناس - معرفش إنهم كانوا بياخدوا مكرونة - والباقي قالوا له: خلاص خلص! الحقيقة أنا اتكلمت مع الفريق فوزى فى هذا الموضوع لكن لما طلعت بره قالوا لى: إن الأكل مش كفاية.

شكرى: إسمح لى يعنى هل العساكر وزنهم بيخس؟ طبعا إذا كان وزنهم مايبخسش يبقى خلاص إذا كان بيملى بطنه بس هتعمل له تخمة. أنا يهمنى من ناحية الصحة بقى إذا كان فيه نقص فى الغذاء ولأ لآ إنى أشوف وزنه، أنا بشوف العساكر لما بتخلص صحتهم مختلفة جدا.

عبد الناصر: لا.. هى الشكوى دى جديدة مش قديمة، يعنى هم موجودين دلوقتى فى خط الدفاع كترت الشكوى، والحقيقة العملية مقدرش أقول: بيخسوا مش هاقدر أوزن كل عسكرى كل شهر ولكن أنا عايزه يشبع؛ مش معقول عسكرى بيعت لى جواب ويقول لى: إحنا جعائين!

سرى للغاية

وجالى جوابات كثير جدا من الناس يقولوا: إنهم مايشبعوش وإن التعيين قليل، مكانوش بيعتوا لى الجوابات دى قبل كده، أما سألت الضباط قالوا فعلا العساكر مايشبعوش. ولكن طلعا لجنة طبية فلجنة طبية فلجنة طبية بتحسب السُعر الحرارى، وأنا واحد بعث لى جواب وقال لى: لما كان الفريق فوزى يقول السُعر وبيأخذوا كذا سُعر كنا إحنا ميتين من الجوع! أيام المؤتمر يعنى واحد فاهم العملية وبيقول: صرفوا لنا شوية عدس مياه حتى ماشبعناش!

وأنا بقول: يافيه سرقة فى السجن وده احتمال موجود، وإذا مكانتش عملية الأكل دى تنضب فى الجيش الواحد عارف بيقى فيه صول التعيين بيسرق أو البلوكامين بيسرق! ودى عملية الحقيقة هم برضه مراقبينها دلوقتى وكلام الأكل مش كفاية، الحقيقة على أد ما بنصرف المليون جنيه أو الـ ٢ مليون جنيه تمن طائرة! الطائرة الفأنتوم بـ ٢,٥ مليون دولار. الحقيقة الطيارين إحنا بنصرف لهم أكل برضه؛ لأنه وجدنا إنه بيبجى مش فاطر من بيتهم، فيطلع على طول فيحصل له نقص سكر ولا حاجة فبياكلوا إجبارى. بالنسبة للعساكر، الحقيقة علشان تقاثل بيقى لازم الشكاوى اللى اشنكوا منها.. أولا: الأكل.

ثانيا: برضه الحما مشكلة، محدش دلوقتى يقدر يستحمى بمياه باردة، وإحنا عارفين فى الفلاحين مهما كان الواحد فقير بيعمل الصفيحة بشوية حطب والعملية دى ويستحموا. ولو نعمل لهم أى وسيلة بلدى إحنا نعملها، بيشتروا حطب محلى ويعملوا مياه سخنة يومين فى الأسبوع كل يوم نص العساكر يستحموا.

العملية الثالثة: إن هم لما بينزلوا الاجازات الضباط بتركب عربية بتوصلهم من الجبل لأقرب مواصلة ومفیش! برضه طبعا ليه حق إذا كنت فى وسط جبل أديله اجازة وأقول له: إطلع إزاي مش معقول يعنى! برضه بنوصله بعربية للسكة الحديد أو لأقرب مواصلة. دى بتعوز شوية عربيات، والحقيقة هذه العمليات عمليات أساسية وبتعوز شوية مصاريف زيادة؛ إذا كنا بنصرف النهارده على الجيش ٣٠٠ نخليهم ٣٠٥ أو ٣٠٧ يعنى.

فوزى: الحقيقة أنا زودت شوية على العدد بس ١٥ كتيبة والأكل، وبعدين عايزين ننقص المياه بالنسبة للمعدة وبالنسبة للفرد؛ فناقلين جركن الى جركن بلاستيك.. الخطوة القادمة يعنى.

عبد الناصر: وبعدين إحنا ممكن نقعد فى الوضع ده سنة أو سنتين، فلازم برضه نرتب هنعلمى العسكرى إزاي وهنأكله إزاي؟

سرى للغاية

فوزى: وبعدين الاجازات أنا صلحتها.

عبد الناصر: وبعدين هناك الكتيبتين السودانيين والجزائريين، الضباط الجزائريين هم أصلهم عساكر يعنى بياكلوا مع بعض، السودانيين عادة الجيش السودانى إن الضباط تاكل مع العساكر ففى الكتيبة السودانيين هنا العساكر والضباط بياكلوا مع بعض فطار وغدا وعشاء. إحنا معندناش إحنا مشينا مع الطريقة الإنجليزية إن الضابط كذا وله ميز ومسئول عن نفسه والعسكرى كذا؛ الحقيقة فى مدة الحرب بتبقى العملية دى صعبة.

فوزى: الملازم داخل وباهم، وبعدين نزول العساكر أجازات هيتم من يوم ١٥.

عبد الناصر: هو أهم حاجة نحسن أكلهم الحقيقة ونزود.

فوزى: وبعدين هو الأسلوب كمان نقطة عيب، فحاولت جمعت ٣٠٠ طباخ فى تعيينهم مكونين فى الحدود والسواحل كتقليد قديم؛ لأنهم كانوا يتمتعوا فى إنهم يغيبوا من الأهالى.

عبد الناصر: متطوعين؟

فوزى: لقيتهم ٣٠٠ واحد، هانضيف عليهم شوية مدنيين وننزل حتى لمستوى الكتيبة، لأن لقيت الطلبة اللى بتيجى من السرايا وبتطبخ لا تخصص ولا وظيفة.

عبد الناصر: طب إذا كان اللى هيطبخ مش طباخ يبقى الأكل مايتاكلش!

فوزى: اللى فات يعنى شوفت حلة الرز - الأزان - النص التحتانى محروق نتيجة لأن اللى بيطلب عسكرى عادى.

عبد الناصر: ده ما ينفعش!

فوزى: ماقلبش الرز.

عبد الناصر: آه.

سرى للغاية

فوزى: وهكذا فى باقى الحاجات اللى فيها السُعر الحرارى كويس زى البصل الأخضر والفجل والجرجير والخس، بيبجى بالسبت مابىغسلوش الغسلة الأصولية اللى بيها يقدم للجندى بشكل كويس! لأ ده بيوزع بالخساية زى ماهى جاية فيبقى فيه شئ من الاستئناف من ناحية الأكل فبيترمى، فترسى على الـ ٣ أرغفة والرز والحاجات البقولية طبعاً. يعنى الأسلوب فى الأكل راخر عاوز تهذيب شوية مع الطباخ المتخصص، وقلت: لو دخلنا شوية مدنيين بمكافآت شاملة تغطى الـ ٣٠٠ واحد؛ هو أنا عاوز حاجة بتاعة ٧١٥ فرد نغطى بيها الجيش فإن شاء الله هاعملها قريب.

بدوى: فى الحقيقة أصبح من المناظر المألوفة القطارات اللى هى بتبدأ من القاهرة وتروح وجه بحرى وتروح بنها وطنطا وما بعدها، إن سطح القطر بيبقى عبارة عن مئات أو آلاف من العساكر! الواحد بيبقى مستغرب إزاي بيقدوا المسافة دي؟! فبنسأل هل دول بيدفعوا نصف أجرة ولا مابيدفعوش؟ وطبعاً زى ماسيادتك قلت: إحنا يهمننا الجندى ولازم نوفر له كل مقومات الراحة النفسية، فطبعاً فيه ناس بنلاقهم واقفين فى طنطا مامعاهمش أجرة السكة اللى هى توصله من طنطا للبرارى فى الخطوط دي؛ فأظن مفيش مايمنع إذا كان دول بيدفعوا نص أجرة يعفوا أو بياخذ اجازة بيقى ياخذ تصريح يروح مجاناً.. فدى تريح نفسياً.

عبد الناصر: أنا فاهم إنهم بياخدوا استمارات.

بدوى: أمال هم بركبوا ليه كده؟

عبد الناصر: مش فاهم.

فوزى: عدم سعة.

صالح: بينزلوا وقت الزحام نفسه، وممكن أيام الاجازات نجهز لهم قطارات ينزلوا بيها.

عبد الناصر: هى الاجازات كل يوم لازم.. مش كده؟

سرى للغاية

فوزى: أيوه يافندم.

صالح: نعمل لهم عربيات مخصوصة.

فوزى: هي فيها استحالة فنية من وجهة نظر الوزارة خصوصا من خط السويس.. الموضوع ده بقاله ٥ سنين.

عبد الناصر: إنهم يزودوا.. هو خط مايل كده.

فوزى: آه. القطارات الأخرى مرتبطة بالفرعيات خصوصا اللي ببيجي من بورسعيد للإسكندرية، لكن هو خد ١٢ استمارة لأنه بينزل فى الشهر مرة مجانا.

عبد الناصر: الحقيقة منظر العساكر وهي راكبة فوق القطر!

صالح: غير العساكر اللي ببيقوا متهربين من الأجرة وكنا بنعمل لهم كمين ويتمسكوا.

بدوى: هايتهرب ليه طالما بياخد استمارة مجانا!؟

عبد الناصر: دكتور حلمى قل لنا على الـ ٩٩,٥.

مراد: أيوه يافندم.

عبد الناصر: بتاع ٣٠ مارس. (ضحك)

أصوات: (ضحك)

عبد الناصر: هو النص ده وزارة التربية والتعليم لازم.

سرى للغاية

مراد: هو الواقع بيان ٣٠ مارس بيان سياسى قبل مايكون بيان خاص بالتنمية أو خطة استثمارية، فوصل به العمل الى خطة عمل، والمناخ الذى سيتم به؛ وبناء على هذا وضع تقرير فى صورة خطة تنفيذية للبيان للجهاز التنفيذى بمعرفة اللجنة الوزارية التى شكلت من مجلس الوزراء. وكان فى نهاية هذا التقرير بيان أو كشف ببعض المهام التى تعتبر إنها تطبيق لبيان ٣٠ مارس، طبعا دى تشمل كل المشروعات وكل الإجراءات، وكان بطبيعة الحال محطوط للسادة الوزراء لأن كل واحد من السادة الوزراء أدرى بشئون وزارته طبعا؛ لأنه يضيف الى هذه الإجراءات وهذه المشروعات ما يرى أنه يتماشى مع بيان ٣٠ مارس.

ثم بعد ذلك سيادتكم أمرت بمتابعة التنفيذ، وطلبت من السادة الوزراء إنهم يتكروا بوضع تقرير عن الخطة اللى هيسيروا عليها فى تنفيذ بيان ٣٠ مارس باعتبار إن هم هيضيفوا الى المهام الموجودة فى التقرير بعدين ما تم تنفيذه من هذه البيانات. ووردت فعلا هذه التقارير تباعا ماعدا وزارتين.. وزارة العدل ووزارة الخارجية. راجعت هذه التقارير، فوجدت إنه أغلبية التقارير اتجهت نحو عرض مشروعات الوزارة وخطة الاستثمارات الموجودة بيها وليس نحو بيان ٣٠ مارس من حيث تغيير أساليب العمل وخطط التنفيذ. ووجدت إنه يمكن مناقشة تقرير، تقرير أمر محتمل إنه يؤدى الى جدل أو مناقشة، وكان بيتم هذا فعلا فى اللجنة التشريعية اللى كان يرأسها السيد حسين الشافعى من ناحية مشروعات الوزارات المختلفة وتناقش. إنما أنا اتخذت اتجاه آخر اللى هو سيادتكم أمرت بيه.. الناحية السياسية؛ فمن الناحية السياسية أنا وجدت أرجع للملحق اللى وجدته بالتقرير اللى اعتمده مجلس الوزراء، وأشوف أى الموضوعات أو النقاط اللى وردت به نفذ وأيها لم ينفذ، باعتبار دى مسائل مادية معلهاش خلاف.

فمررت على بند بند وكتبت على كل بند نفذ أو لم ينفذ، فكانت النتيجة إنه الإحصاء إنه عدد كبير جدا من المهام لم يتم تنفيذها خلال الـ ٦ أشهر من يوم اعتماد بيان ٣٠ مارس. ليس معنى ذلك إن الوزارات معملتش مهام أخرى أو منفذتش مشروعات أخرى أو مكانش ليها خطط أخرى، لا.. يصح اللى حصل فعلا إنه كان فيه أعمال ومشروعات وخطط بتنفيذ، إنما فيما يختص بهذه المهام بالذات اللى كانت أختيرت باعتبارها إنها معبرة عن روح بيان ٣٠ مارس واللى يمكن الشعب بينظر لها باعتبارها إنها ناحية تنفيذية للبيان أو تمسك بروح البيان، وجدنا إن أغليبتها لم ينفذ!

سرى للغاية

وانتهيت من هذه الملاحظات الى أنه يجب إن احنا مايفترش حماسنا لبيان ٣٠ مارس؛ لأنه يعتبر نقطة تحول وتغيير فى أساليب العمل بعد الهزيمة التى حدثت، وإنه لو إحنا تحمسنا لفترة ثم صرفنا النظر عنه، الشعب نفسه مش هيبقى يثق ويطمئن لما نعهه بمشروعات أو بإجراءات جديدة؛ لأنه هيقول برضه هى فترة حماس وبعدين هنهأ، وخصوصا إنه الناس - زى سيادتك ما بتعبر دائما - حساسين وبيراقبوا كل حاجة وبيحسبوا وبيحتفظوا بيها فى نفوسهم، وعند أى مناقشة بيفتحوا المسألة بيقولوا: إنتو قولتوا فى ٣٠ مارس كذا وماحصلش وإنتو بتقولوا كذا! فيبقى فيه عملية حساب دقيق من جانب الشعب يمكن مابيضهرلناش إنما بيفضل كامن فى النفوس، وإحنا فى وقت عصيب ونحتاج فيه الى إن كل النفوس تكون صافية ومتجهة مع الدولة نحو المعركة؛ يبقى يقتضى طبعا إن احنا نراعى هذه الناحية توفيراً للجو الذى يجب أن يتوفر فى الجبهة الداخلية أثناء المعركة.

ده موجز التقرير.

عبد الناصر : التفصيل بقى.. نمسك وزارة وزارة.

مراد: التفصيل: أولاً: كانت فيه نقاط المفروض إنها تحل على مستوى الدولة كلها، إما لأنها متكررة فى كل الوزارات وإما لأنها محتاجة الى قرارات تصدر من مجلس الوزراء؛ فمثلاً: تبعية الأجهزة الحكومية التى لا تتبع وزارة أو سلطة معينة، هذا الموضوع لم يدرس فى لجنة التنظيم والإدارة فى لجنة وزارية.

يعنى مثلاً زى جهاز التنظيم والإدارة المركزى، الجهاز المركزى للتدريب الجهاز المركزى للتعبئة والإحصاء؛ ففيه كثير من الأجهزة لم يحدد تبعيتها حتى الآن. النقطة الثانية: وضع أهداف الخطة للعام القادم وأولياتها وعرضها على مجلس الوزراء لمناقشتها، لم يتم.

النقطة الثالثة: وضع جدول زمنى ينتهى قبل انعقاد المؤتمر يقدم كل وزير سياسى فى وزارته فى حدود أهداف الخطة الى مجلس الوزراء لمناقشتها وإقرارها. حصل إن قدمت هذه التقارير إنما بعد ما كان المؤتمر القومى انعقد، فوجبت مناقشتها فى اللجنة السياسية برئاسة السيد حسين الشافعى بعد المؤتمر؛ فأنا كتبت أنه تم تقديم هذه التقارير ولكن فى غير الموعد المحدد ولم تتم مناقشتها بعد.

سرى للغاية

الموضوع الرابع: المجالس القومية المتخصصة، تشكيلها بعد إنتخابات الاتحاد الاشتراكى بكافة مستوياته طبعا لم ينفذ، يمكن الوقت اللى انقضى من إتمام تشكيل الاتحاد الاشتراكى وبين وقت هذه الجلسة يمكن مكانش كافي لوضع هذا التنظيم. فيه قرارات تنظيمية عامة برضه تسرى على كل الوزراء.. عدم إنشاء وظائف جديدة تزيد عن الدرجة الثالثة بأى حال من الأحوال. هذا المبدأ وجد مرارا فى الضرايب إتعين ناس فى وظائف أو فى درجات أو ترقيات أو تعينات، يمكن آخرها أول إمبراح كان فيه ثلاثة وكلاء وزارة فى ديوان مجلس الأمة واثنين وكلاء وزارة فى وزارة الإدارة المحلية، وفيه برضه وكلاء وزارة اترقوا فى بعض الوزارات قبل موعد ديسمبر. قصر مجانية التعليم على أبناء الجمهورية مع تقرير منح دراسية فى صورة إعفاء من رسوم لعدد من أبناء الدول العربية؛ برضه ماتمش وبيستمرنا يتمتعوا بالمجانبة كمواطنين.

عبد الناصر: موقفتناش على الكلام ده فى المناقشة.. موافقتناش على البند ده بالذات!

البرلسى: خفضنا العدد شوية.

عبد الناصر: آه.. ولكن موافقتناش.

مراد: هو يمكن المناقشة على ما أذكر صورة إعفاء من الرسوم والباقيين يدفعوا، وإحنا ماشيين برضه فى وزارة التربية والتعليم على هذا المبدأ لأنه بييجلنا تلاميذ مثلا من السعودية ندخلهم مدارس خاصة يدفعوا مصاريف مندخلهموش مدارس حكومية؛ لأنه ليه الشعب المصرى يدفع للسعوديين؟! فأنا بدخلهم مدرسة خاصة. لما بتجى حالة ليها طابع خاص يعنى ابن سفير مجاملة للسفير يصح أحوله لمدرسة حكومية، إنما بالنسبة للأفراد العاديين بدخلهم مدارس خاصة علشان الدولة ماتتكفلش بالرسوم الدراسية الخاصة بيهم.

وضع دليل للعمل فى أقسام الوزارات المختلفة يضم القوانين والقواعد والقرارات المنظمة للعمل لكل قسم منها.. نفذ فى بعض الوزارات.

إعادة تنظيم إدارة المحفوظات فى كل وزارة وجهاز على الأسس العلمية الحديثة، مع تغيير مستوى العاملين بها.. لم يرد فى التقارير ما يفيد التنفيذ.

سرى للغاية

وجوب احترام كل مشروع بدراسة اقتصادية ترفق بوسائل تأسيسه وتنفيذه؛ برضه لم ينفذ، هو طبعاً موجود إنه فيه دراسات اقتصادية يتم حسب ما ورد في تقارير وزارات الإنتاج، إنما مبتعثش أو ما بترفقش بالمشروعات.

إتخاذ ما يلزم لرفع مستوى الكفاية الإدارية للأجهزة الحكومية، بإحلال عناصر جديدة مؤهلة محل العناصر الموجودة الغير مؤهلة.. لم ينفذ، حتى إحنا اللي بنعينهم جداد بمؤهلات جامعية يضافوا على الموجودين، ولزال فيه إدارات فى الحكومة بيقوم بيها ناس أصلهم فراشين ولما بنحط جنبهم جامعيين مبيرضوش يشتغلوا؛ لأنهم بيعتبروا إن المستوى غير لائق بيهم؛ زى فى إدارات شئون العاملين وإدارات المحفوظات.. إلخ. توحيد جهات الرقابة التى تتبع شركات القطاع العام، برضه ماتغيرش الوضع فيما يختص بالرقابة.

النظر فى مشروعات القوانين الخاصة بالنقابات المهنية وإصدارها، وفتح الباب لإجراء الانتخابات المؤجلة لمجالس إدارتها؛ نفذ أخيراً المشروع الخاص بنقابة المحامين.

عبد الناصر: فاضل نقابة الأطباء بس وده موجود فى مجلس الأمة، وأنا طلبته إمبارح فى اللجنة التنفيذية، وهو كان فيه طلب فى اللجنة التنفيذية إن احنا نأجل الانتخابات بالنسبة للصحفيين والكلام ده، وأنا موافقتش الحقيقة كل الانتخابات هتمشى؛ لأن الكلام اللي قلناه هنا فى المجلس ماكنش ينطبق على النقابات دى، كان بينطبق على الكلام اللي قاله كمال رفعت خاص بالتنسيق بين انتخابات العمال لأن دى عملية كبيرة.

مراد: فيه نقابة المعلمين يافندم انتخاباتها فى يناير.

عبد الناصر: آه.. ماشية.

مراد: ماشية.

وزارة الإدارة المحلية: وضع خطة للنهوض بمستوى القرية باعتبارها الرسالة الأساسية للإدارة المحلية. دراسة مشروع تغذية القرى بالكهرباء بشبكة الإنارة العامة عن طريق التعاون الشعبى.. لم ينفذ.

سرى للغاية

دعم الوحدات المجهزة واستكمال مقوماتها.. لم ينفذ.
القضاء على المظهرية في المشروعات المحلية ووقف بناء المساكن المستقلة
لرؤساء المدن، ودراسة إمكان تحويل المزيد منها الى مرافق للشعب؛ وُعد بذلك في تقرير
وزارة الإدارة المحلية، ويمكن قرأنا أخيرا بعض القرارات من الوزارة بمنع بناء مساكن جديدة
لرؤساء المدن.

وضع خطة للارتقاء بمستوى الإدارة المحلية الى المدن ثم القرى؛ وعد بذلك في
تقرير وزارة الإدارة المحلية.

مراجعة أوضاع العاملين في الإدارة المحلية، بما يضمن أن يكونوا من نفس
المدن والقرى التي يعملون بها بقدر الإمكان وكفالة استقرارهم بها.. لم ينفذ.

عاشور: يافندم أنا بعث من حوالى أربعة أيام تقرير متابعة أولى للدكتور حلمي، أعتقد إنه غير الصورة
هنا وفيه خطوات اتخذت فعلا، يعنى نرجو فى المتابعة الثانية أن نكون جنبنا حصيلة أكبر
من كل النقط دى.

مراد: وزارة الإرشاد: وضع خطة إعلامية للتصدى للدعاية الإسرائيلية. لم توضع خطة شاملة
مدروسة واضحة المعالم صالحة للتطبيق فى الداخل والخارج، يعنى ورد فى التقرير: إن
فيه جهاز موجود ويديرس ويبراجع ويبتصدى للدعاية، إنما مفيش خطة شاملة كاملة
للداخل والخارج.

مراجعة الأغاني والتسجيلات لمنع مايشوبها من الميوعة والخلاعة.. يتم تنفيذ
ذلك.

عبد الناصر: فى الآخر، نسمع كلامه والآخر الوزارات تتكلم.

مراد: وقف الإرسال التلفزيونى عن القناة الثالثة اتفاق إن الإرسال على قناتين.. لم ينفذ بل عرض
تقرير وزارة الإرشاد فى التنفيذية.

عبد الناصر: هو عرض فى الجلسة.

سرى للغاية

مراد: هو عرض فى الجلسة وعرض فى التقرير كمان.
حظر تداول كتب الإثارة الجنسية.. ذكر تقرير وزارة الإرشاد بأنه يتم ذلك.

عبد الناصر: لم يتم.

مراد: هو التقرير قال: بأنه يتم ذلك.

عبد الناصر: أكلك منين يابطة منعوها؟! (ضحك)

مراد: دى منعوها يافندم.

عبد الناصر: أنا سامعها الجمعة اللي فاتت! (ضحك)

أصوات: (ضحك)

فائق: مش داخلة يافندم.

عبد الناصر: ماهو لازم تفهموه، هو لازم سمع المقطع الأولانى بس! (ضحك)

أصوات: (ضحك)

مراد: وزارة الإسكان: إنشاء لجنة مشتركة بين الإسكان والخزانة وجهاز التنظيم والإدارة لإعادة النظر فيما تشغله الدوائر الحكومية من مبانى غير مملوكة لها.. لم ينفذ.

عبد الناصر: ده لم ينفذ من ٢٠ سنة، ولن ينفذ إلا إذا واحد بعث البوليس الحربى روى العفش فى الشارع زى ما حصل صلاح هدايت مع مش عارف مين فى وقت ما، يعنى لازم تؤخذ قرارات وفيه قرارات غير قابلة للتنفيذ! حتى الأبنية الجديدة بياخذوها ويخلوا جزء من القديمة!

سرى للغاية

سليمان: ده فيه ناس فى الوزارات مالهمش مكاتب!

مراد: تشجيع القطاع الخاص للبناء وتوفير المواد البناء اللازمة له.. نفذ الى حد ما.
التدخل لوقف ارتفاع اثمان الأراضى عن حد معين وفقا للموقع.. لم ينفذ.
تمثيل أصحاب العقارات والسكان فى لجان الطعن فى تقدير الإيجارات.. لم ينفذ.
هو فيه مشروع قانون خاص بالعلاقة بين الملاك والمستأجرين إنما لازال تحت الدراسة.
إعادة النظر فى أسلوب بيع الشقق المملوكة للحكومة والقطاع العام.. لم ينفذ.
مراجعة القيمة الإيجارية لمشروعات الإسكان الشعبية كمشروع ناصر للإسكان
مما يؤدي الى خفضها حتى تتساوى مع مثيلتها من القطاع الخاص، لم ينفذ تنفيذًا كاملاً
على هذا النحو؛ هو حصل تخفيض فعلاً إنما مش على النحو المطلوب.

عبد الناصر: بس التخفيض كان كبير أوى.

مراد: كانت كبيرة يافندم لأنهم أضافوا التخفيضات السابقة وقالوا خفضنا نسبة كذا؛ فبقت
التخفيضات السابقة زائد اللاحقة فبانة كبيرة.

عبد الناصر: لا.. لا.. التخفيض أنا شوفت المذكرة، الشقق بقى إيجارها قليل أوى وأنا رأيى كان قليل،
لكن هل مشى بالنسبة لكل المحافظات؟

صوت: مشى.

مراد: وزارة الاقتصاد والتجارة الخارجية: إعداد خارطة توزيعية لموقع التمثيل التجارى ومكاتب
شركات التجارة الخارجية مما يؤدي الى ضغط النفقات.. لم ينفذ. وورد فى التقرير إنه فيه
سياسة مرسومة لإنشاء المكاتب التجارية بحسب علاقتنا التجارية، إنما مفيش حاجة محددة
بالاسم يعنى دراسة واقعية.

إعادة النظر فى سياسة استيراد بما يتفق مع اقتصاد الحرب.. يجرى تنفيذه.

سرى للغاية

إعادة تنظيم الجهاز المصرفى ليقوم بالدور الذى يجب أن يقوم به فى ظل نظام اشتراكى؛ من حيث تمويل مشروعات القطاع العام، والرقابة على تنفيذ الخطة، تقرر أخيرا دراسة هذا المشروع فى مجلس الوزراء من جلسيتين.

وزارة الأوقاف: استئناف بناء مساكن من أموالها تخفيفا لأزمة المساكن.. نفذ.
وزارة البحث العلمى: وضع خطة قومية للبحث العلمى.. بدأت الوزارة فى ذلك وإن كان لم يتم بعد.

دعم مركز الإعلام والتوثيق العلمى ليكون جهازا مركزيا لتسجيل كافة الأجهزة والمراجع والدوريات.. جارى التنفيذ.

وضع نظام خلق الحوافز لدى الباحثين وحسن اختيار العناصر الصالحة.. لم يتخذ فى ذلك إجراء جديد.

إيجاد نوع من التعاون الدورى المنظم فى مجال البحث العلمى مع الدول النامية الصديقة.. لم ينفذ.

تقديم تقرير سنوى الى السيد رئيس الجمهورية عن نشاط البحث العلمى خلال السنة، والمعوقات والحلول المقترحة لتذليلها.. لم يحن بعد موعد التنفيذ.

التربية والتعليم: وضع خطة للتعبئة العامة الشاملة لمكافحة محو الأمية.. وضعت أسس الخطة وهى تحت تصرف التنظيم السياسى.

عبد الناصر: كم تنفذ يعنى؟ (ضحك)

أصوات: (ضحك)

مراد: لم تنفذ.

العناية بتدريس اللغات والدراسات العملية لتطوير التعليم الفنى والتربية الدينية؛ تضمنتها مشروعات القوانين الجديدة المعروضة على اللجنة الوزارية المختصة.

سرى للغاية

إيجاد اللازم لإعادة النظر فى أوضاع الدراسات التعليمية الخارجية، وتنظيم المعونة فى ضوء تقديم الخبرة البشرية كلما أمكن ذلك؛ تم تنفيذ ذلك غير إن الوضع أعيد الى ما كان عليه بالنسبة للسودان، انتظارا لدراسة متكاملة للتعاون الثقافى والتعليمى بين البلدين.

وزارة التعليم العالى: تحويل المعاهد العليا الى معاهد فنية تطبيقية ذات مستوى رفيع، بما يقضى على الازدواج بينها وبين الكليات الجامعية؛ تضمنت التعديلات المقترحة فى قانون تنظيم الجامعات واللائحة التنفيذية المعروضة على اللجنة الوزارية المختصة بذلك. تحديد أعداد المقبولين بالكليات الجامعية والمعاهد العليا على مستوى الشعبة الدراسية وليس على مستوى الكلية أو المعهد.. لم ينفذ.

وزارة الثقافة: إحكام الرقابة على الأفلام السينمائية والتلفزيونية لمنع عرض ما يؤثر تأثيرا ضارا على الشباب بالنسبة للأفلام السينمائية.. لم ينفذ.

عبد الناصر: أنا فاهم إن الرقابة زادت.

مراد: بعد ماناقتنا التقرير كان عرض فيلم وصل الى القمة عن كل ماسبقه، يعنى اللى هو عنوانه العربى "كيف تتعلم الحب؟"، وبعدين كان السيد الدكتور ثروت عكاشة أما كان فى الخارج بالصدفة طلب منى إنى أشوفه يوم جمعة، والسيد ثروت عكاشة كان رجع يوم سبت، فطلبته فأول ما وصل فقال لى: هامنع عرض هذا الفيلم لأنه جهاز الرقابة اللى كان وافق عليه القديم مش اللجنة الجديدة، ولكن لقيت إنه عرض فى إسكندرية نفس الفيلم. وبعدين فيه بعض أفلام لازالت معروضة.

عبد الناصر: أنا شوفت الأفلام المعروضة اللى هى للكبار فقط اللى هو dance girl dance، فيلم لطيف مفيهش حاجة! اللى هو بيقولوا حبوب منع الحمل مافيهش حاجة.

مراد: أنا شوفته.

سرى للغاية

عبد الناصر: مافيش حاجة.

صوت: يعنى بتشوف! (ضحك)

عبد الناصر: (ضحك)

أصوات: (ضحك)

مراد: أنا بتابع بحكم عملى! (ضحك)

أصوات: (ضحك)

عبد الناصر: بيروح من ١٠! (ضحك)

أصوات: (ضحك)

عبد الناصر: الحقيقة هو الأفلام الهندى ما بتتعرض، ولا زى الأفلام المصرى ولا الأفلام الأمريكانى، وبعدين كلها رأسمال خاص وكلها قطاع خاص، ولكن جميع الأفلام موجهة توجيه ضد الفقر يامع الاشتراكية ياخذ زيادة النسل، ياخذ السرقة والجريمة.. حاجة غريبة! وبعدين حتى مفيش بوس حتى مثلا فى الأفلام الهندى مفيش حاجات بهذا الشكل وبتلاقى الموضوع ماشى، وبعدين تيجى الأفلام دى هنا بيقتد الفيلم ١٠ أسابيع الناس بتشوفه وفيه الرقص الهندى وحاجة لطيفة. فهى العملية أفلامنا إحنا بقى برضه عليها رقابة أشد من الرقابة على الأفلام الأجنبية، ولكن الموضوع أصله محدود خالص. ولكن بالنسبة للأفلام الأجنبية، أنا اللى فاهمه دلوقتى إن الرقابة كانت الأول بتتساهل فى حاجات ما بتقصهاش دلوقتى بتقص كل حاجة.

سرى للغاية

مراد: وزارة الحربية: إعفاء القوات المسلحة من كل عبء لا يتصل بالعمليات الحربية.. جارى تنفيذ ذلك.

تنظيم مرور بعض القوات المسلحة داخل العاصمة لتحقيق التلاحم بينها وبين الشعب؛ يجرى تحقيق هذا الهدف بوسائل أخرى اللى هى الزيارات للجبهة سواء لأعضاء التنظيم السياسى أو الطلبة أو الجامعات.

وزارة الخارجية: إجراء التغيير اللازم فى شاغلى مناصب السلك السياسى الدبلوماسى بما يضمن تحقيق المواصفات.. لم ينفذ بالصورة المرجوة.

تقديم خريطة توزيعية لمواقع تمثيل السلك الدبلوماسى والقنصلى بمستوياتها فى كافة أنحاء العالم.. لم ينفذ.

تحديد فئات تمثيلنا الخارجى من حيث أعداد العاملين فى مستوياتهم وتخصصاتهم وفق المصالح التى يربهاها.. لم ينفذ.

وضع أسس نظام التخصص فى السلك الدبلوماسى والقنصلى، وتحديد نسبة معينة لا يصح تجاوزها ممن يعينون فى السلكين من خارجهما.. لم ينفذ.

تنظيم عقد مؤتمرات من غير السلك الدبلوماسى على مستوى الوزارة وعلى مستوى المناطق ومستوى السفارات بصفة دورية؛ تم عقد مؤتمر لدبلوماسينا فى الدول العربية بوزارة الخارجية.

وزارة الخزانة: إعادة النظر فى قانونى التأمينات الاجتماعية والتأمين والمعاشات لموظفى الدولة؛ لم ينفذ طبعا فيه دراسات موجودة جارية إنما لم ينتهى الى قرار.

جرد المخازن الحكومية وتصفية محتوياتها، وإعادة توزيع المخزون وفق احتياجات والأولويات المختلفة مع وضع قواعد علمية لإدارتها.. لم ينفذ.

وضع قانون مالى يحل محل القوانين واللوائح المالية التى لم تعد تسير روح العصر.. لم يصدر بعد هذا القانون.

النظر فى عقد هدنة ضريبية لتسوية الضرائب المتأخرة والإعفاء من الجزاءات للمخالفين، ووضع أسس جديدة مبسطة لفرض الضرائب.. لم ينفذ.

سرى للغاية

عبد الناصر: هو اللى كان طالب كده.

حجازى: تقرير المتابعة لم يصله.

مراد: هو فى التقرير موجود الأعذار وطبعا السيد وزير الخارجية كان الله فى عونہ هو مش فاضى.

عبد الناصر: لا.. سيبهم هم فى الآخر يدوا الأعذار! (ضحك)

مراد: وزارة الشباب: إعداد خطة للسياسة الواجبة للإتباع للعناية بأمور الشباب من كافة النواحي بالتعاون مع الأجهزة المشرفة على الشباب؛ وضعت دراسة لم تناقش بعد مع الجهات المعنية لوضعها موضع التنفيذ.

وزارة العدل: وضع النظام الكفيل بتحقيق التخصص بين القضاة.. لم ينفذ.

توحيد الإفتاء القانونى وتنظيمه.. لم ينفذ.

إعداد مشروع قانون بإلغاء موانع حق التقاضى؛ لم ينفذ بل قدمنا مشروعا للمعاونة على تحقيق المطلوب ولم يتخذ فى شأنه خطوة إيجابية.

وزارة العمل: مراجعة المركز المالى لهيئة التأمينات الاجتماعية إكتواريات مع

إعادة النظر فى نظام التأمينات على ضوء هذه المراجعة.. لم ينفذ.

وضع سياسة مرسومة لتنظيم العمل بالخارج وتنظيم إدارة شؤونه بما يكفل

الحرص على استبقاء الكفايات اللازمة للبلاد، وإيجاد فرص ملائمة للخارج للراغبين فيه..

توجد دراسات لم تنفذ بعد.

وضع سياسة مدروسة للتدريب المهنى بالتعاون مع الجهاز المركزى للتدريب

تجتمع لجنة لهذا الغرض؛ لم تنتهى بعد الى قرار بالتنفيذ.

تنظيم الإفتاء فى شكوى العاملين بحيث يلزم بها القطاع العام.. لم ينفذ.

فتح باب الانتخاب لمجالس إدارة النقابات العمالية.. لم ينفذ بعد.

سرى للغاية

عبد الناصر: لأ.. إمبارح كان فيه مذكرة فى اللجنة التنفيذية العليا، وقلنا: يتفتح الموضوع والتواريخ كلها ماشية على ماهى عليه.

مراد: وزارة الصناعة: دراسة قواعد مشاركة العمال فى الأرباح مما يؤدي الى منع اشتراك العمال الذين وقعت عليهم جزاءات تزيد عن حد معين، واستبعاد الزيادة فى الأرباح غير الناتجة عن زيادة الإنتاج من عملية التوزيع.. لم ينفذ.

ضرورة اقتران كل مشروع صناعى لدراسة اقتصادية مفصلة ترفق بوسائل تأسيسية.. لم تنفذ.

وزارة النقل: تعزيز شبكة المواصلات الكهربائية.. لم ينفذ.

تصنيع قطع الغيار اللازمة للسيارات المحلية.. لم ينفذ.

النظر فى التفاهم مع الجهات المختصة على المغايرة فى مواعيد بدء العمل وانتهائه فى المصالح الحكومية والمجالس والجامعات؛ وضع مشروع وشيك التنفيذ.

إنهاء بعض خطوط السيارات فى أوقات الضغط فى أماكن التجمع الكبير لزيادة دوراتها؛ وضع نظام جديد لبعض خطوط السيارات لا يلقى رضاء من الشعب.
دراسة إمكانية استخدام التاكسيات لنقل مشترك؛ تمت الدراسة على أساس الرفض استنادا الى حجج قابلة للمناقشة.

الجهاز المركزى للتعبة والإحصاء: إعداد إحصائيات دقيقة عن القوى العاملة من حيث الموجود منها فى التخصصات المختلفة، ومدى توقعات النقص فيها والتنبؤات عن احتياجاته من كل تخصص بناء على دراسة معدلات الأداء، ومع الأخذ فى الاعتبار حاجة الدول العربية والإفريقية.. لم ينفذ.

الجهاز المركزى للتنظيم والإدارة: تحديد رسالة اختصاصات كل وزارة وجهاز فى الدولة لمنع التكرار والتداخل.

النظر فى التنظيم الداخلى لكل منها بما يتفق مع تحقيق رسالتها.

وضع مواصفات لشغل الوظائف فيها.

سرى للغاية

إعادة النظر فى اختصاصات كبار العاملين فى أجهزة الدولة مما يقضى على المركزية الشديدة.

اتخاذ اللازم لحظر مد مدة خدمة العاملين لعدم سد الطريق أمام العناصر الشابة.

إعداد مشروع تعديل لقانون العاملين بالدولة.

لم ينفذ من ذلك شئ لاعتباره تطبيقا لبيان ٣٠ مارس، سوى ما بدأ فيه من دراسة لأسس تعديل قوانين العاملين بالدولة المعروضة حاليا على اللجنة الوزارية التشريعية وللتنظيم والإدارة.

أحمد: بالنسبة للبحث العلمى أقدر أقول: إن احنا فى الـ ١٤ سنة اللى فاتت كانت تعتبر امتدادا للجامعات، بمعنى آخر عندى فى الوزارة ٥ آلاف منهم أكثر من ١٠٠٠ حاملين دكتوراة وماجستير فى المركز العلمى للبحوث من نقلهم الى المجال التطبيقى؛ وبذلك يعطى الروح والثقة للبحث العلمى. والحاجة الأساسية اللى بنادى بها براءات الاختراع، ولا بد أن يكون فى الدولة مركز لبراءات الاختراع مثلما هو موجود فى الدول الكبرى.

وهناك حاجة جديدة وهى استقبال العلماء لفك شفرات براءات الاختراع للاستفادة بيها، مثلما حدث فى أمريكا واستعانتها بعلماء ألمان. وبراءات الاختراع تابعة لوزارة التموين، وأستاذن السيد وزير التموين نقلها الى وزارة البحث العلمى لكى أتحوّل تدريجيا الى البحوث التطبيقية وأستفيد من مساعدات الدول الصديقة.

الجزء الثالث: اللى هو فقدان الثقة فى براءات الاختراع، بحيث إن معظم البحوث انتقلت الى مجال الصناعة ولكن بعض هذه البراءات ما استوتش فعلا؛ وده اللى سبب إن رجال التطبيق تعبوا من البحث العلمى، فعلى هذا الأساس اتفقت مع ألمانيا الشرقية على إنهم يساعدونا فى هذا بحيث إن التطبيق يكون سليم. من ناحية التمويل أنا حاسس بظروف البلد، ولكن عندنا طاقة علمية فى البلد ولكن لا نحسن استغلالها.

أحتاج الى إعادة ثقة للبحث العلمى، وانتقلت الى الوزارات الحربية الزراعة والصناعة لكى نوجد هذه الثقة. بالنسبة للتمويل أنا أرجو من السيد الدكتور عبد العزيز حجازى بأى نسبة لكى تعطينا الثقة، وأنا كفيل بحسن استخدامها.

عندنا ثروة أجهزة حوالى ٣ - ٤ مليون جنيه، نقوم الآن بعمل حصر للأجهزة على مستوى الجمهورية لكى نصل الى جغرافية التوزيع؛ فأنا كل ما أرجوه هى إيجاد الثقة للبحث العلمى.

سرى للغاية

وفوجئت فى المؤتمر القومى إن احنا مقصرين والبحث العلمى غير موجود خالص! ولجأت الى السيد وزير التعليم والتعليم العالى والسيد وزير الثقافة الدكتور ثروت عكاشة لما يرجع، بعض قصور الثقافة ببسحوا لى بمكان معين إن أنا أوزع هذا لكى أعطى فكرة إيه هو البحث العلمى. والجمعيات العلمىة الموجودة جمعيات تقليدية تتبع من الجامعات لرسالة مستوى معين من البحوث، وبرضه قصدت إن الجمعيات العلمىة إنها تعيننا فى تقديم وإلقاء بعض التعريفات المبسطة عن البحث العلمى وتطبيقه.

والمجهود صعوبته فى حاجة واحدة هى الـ man power على إنه يوجد التقاليد؛ ودا أملى الوحيد إن بالتقاليد إنى لو قدرت أنجح، وأنا عندى ثقة فى الموجودين وأكثرهم أولادى، ودى بتبشر إن العلمىة مش عملية تمويل من الأجهزة. وأرجو إن ظروف البلد تتحسن ويتحقق التمويل اللازم، فيبقى وضع البحث العلمى يبشر بالتقدم.

السبب إن أنا قلت هذه الجملة إنى بانتهى إنى سأقدم لسيادتكم بتقرير، وأتمنى أن يكون عندى فى آخر السنة شئ من النتائج أقدر أتقدم بيها، وأملى الوحيد فى المجالس المتخصصة. وزارة البحث العلمى هى السكرتير الفنى للرئاسة، لأن عملية تخطيط البحوث هى عملية خاضعة طول ١٤ سنة عملية خاضعة، وإحنا رسمنا الخطة واليونسكو عمل سبع تقارير؛ يبقى أول خطوة إنى هل هأقدر إن أنقل الحاجة اللى تناسبنى فى الظروف الحالية.

ولم يكن هناك متابعة، فكان باستمرار بتظهر إن الخطة العلمىة لايمكن أن تجد النور.

وزارة البحث العلمى واضعة كل الإمكانيات الآن؛ لأنها تشعر شعور المواطن إنها تساعد فى حل المشاكل بس فى النطاق اللى يكسبنى الثقة العلمىة، مش هأقدر أقول أبدا أنا أقدر أحل بها لكن أنا باعلنها ويقول: إن أنا بحاول ويمكن ثقتى إن الكلام بتاعى وجد التطبيق فى العالم، فأنا بحاول إنى آخذ الجزء اللى يمثل الواقعية والقدرة.

عبد الناصر: بالنسبة للبحث العلمى فى بلد زى بلدنا الحقيقة، إحنا مش هنتختر حاجات جديدة ولكن إحنا المفروض بنوجد حاجات موجودة فى العالم بس تعتبر سر من الأسرار. الحقيقة فى دول زى اليابان والاتحاد السوفيتى كانوا اتبعوا نظام الرشوات والحصول على هذه العمليات بأى شكل من الأشكال؛ والجاسوسية فى الناحية العلمىة يعنى يمكن أقوى من الجاسوسية فى الناحية العسكرية.

سرى للغاية

فإحنا مثلا مش هنخترع قنبلة ذرية.. اخترعوها أو تفجير الذرة هم اخترعوها قبل كذا يمكن من زمان يمكن من ٢٠ سنة.. سنة ١٩٤٥، وإحنا دلوقتى موجودين بعد ٢٠ سنة وتطورت العملية. وبعدين لما تيجى فى هذا الموضوع بالذات محدش هيرضى يدينا أبدا السر بتاعه، وإحنا بعتنا بعثة للصين وراحوا وأنا كنت اتفقت مع شواين لاي فقال لهم: إن محدش اداهم السر بتاع العملية وهم اعتمدوا على نفسهم. الحقيقة الروس قالوا لى العكس.. الروس قالوا: إن هم اللى ادهم المعونات الكاملة اللى وصلتهم الى هذه العملية!

النهارده كان فيه تقرير من اسرائيل يمكن طلع الأسبوع اللى فات أو اللى قبله، بيقلوا واحد من العلماء تعليقا على عملية إن اسرائيل رافضة توقع على معاهدة منع انتشار الأسلحة الذرية، فهو بيقول: إن تفوقنا الوحيد على العرب هو الناحية التكنولوجية، وإن إحنا لازم نستमित فى هذه الناحية عشان يستمر تفوقنا على العرب دى الحقيقة الناحية المهمة.

الناحية التكنولوجية هى فى الحقيقة مهياش حاجات جديدة مهماش بيخترعوها حاجة أبدا هم بيحبيوا من الأمريكان والفرنساويين، لو إحنا بذلنا جهد فى هذا فيه ناس مستعدين فى فرنسا يدوا كذا كذا. اللى هم الصاروخ اللى جابوه جابوه من فرنسا، عمليات البحث الذرى جابوها من فرنسا، عملية الاتصال بالعلماء بيجيلهم أكبر علماء يهود من هنا وهناك. وأنا مرة كنت شوفت واحد سويدي من العلماء وبيقول لى: إحنا عندنا واحد هنا اسمه الدكتور النادى، بيقول لى ده يقدر يعمل قنبلة ذرية. الكلام ده كان من عدة سنوات، وبعدين شوفته فى يوم العلم كان واخد جائزة تقديرية، شعره أبيض كده وأنا بصيت له وأنا سمعت عليه من واحد أجنبى كان سويدي.

فالحقيقة لازم نمشى فى الأبحاث يعنى، أنا أما جيبتهم قالوا: عايزين أموال كتيرة جدا، كان لازم نمشى بحيث إن إحنا لو اضطرينا فى يوم ما هنشغل فى هذا الموضوع. وبعدين متهيألى إنكم لازم تتسقوا مع المخابرات، والمخابرات بيقى فيها فرع علشان يسرق الحاجات اللى إنتو عايزينها ولو يدفعوا فلوس، وبعدين إحنا شوفنا الاتحاد السوفيتى سرق صاروخ من ألمانيا الغربية وطلعوا بيه! وبعدين فيه نقطة تانية الحقيقة أنا بعتبر إن ٨٠٪ أو ٨٥٪ من المعلومات والأسرار الأمريكية منشور فى الجرايد والمجلات الأمريكية، لدرجة حتى إنهم فى وقت ما قالوا إن التصميم بتاع اللعب اللى عاملينها هو نفس التصميم بتاع الأسلحة الموجودة!

سرى للغاية

فلو يبقى فيه متابعة وفيه قسم مخابرات علمية ويتابع، وده اللي عاملينه الروس يتابع المجلات، وتقدرنا تطلعوا على طول بحاجات ومفيس داعى إحنا نقعد نبحت ونقول: إزاي نعمل أسمنت أو غيره! كل ده منشور. ولما نيجى نتكلم عن الدولة العصرية والتكنولوجى، الحقيقة مش معناه إن احنا هنخترع أشعة ليزر مثلا لأنها موجودة عندنا فى الكلية الفنية أنا شوفته. إزاي البلاد الثانية ابتدت تطور وتوسع إحنا بنشوف هذه العملية.. وهو دا الحقيقة موضوع البحث العلمى.

العملية الثانية الحقيقة اللي اتكلمت فيها اسرائيل، هى عملية خاصة بالأسلحة اللي بينتجوها، وقالوا: إن هم السنة اللي فاتت ضاعفوا إنتاجهم الحربى فى أنواع مختلفة من الأسلحة والتطوير. إحنا العملية لا زالت مش ماشية جدية وفى رأى إنها كانت ماشية مظهرية أكثر منها جدية؛ يعنى إحنا مثلا مابنعملش الهاون.

البشرى: هى مش مظهرية يافندم، إحنا متوقفين يافندم.. فيه توقف تام، من سنة ١٩٥٨ معندناش أى خط نمشى فيه فى مسائل الإنتاج الحربى.

عبد الناصر: نبقى نتكلم فى موضوع الإنتاج دا، لأن معرفش شوفتوا التقرير اللي من اسرائيل عن اللي عملوه فى السنة اللي فاتت بالنسبة للإنتاج الحربى؟ وبعدين بيقلوا إن عملية فرنسا بتخليهم لازم يعتمدوا على نفسهم ودا موضوع حياة أو موت بالنسبة لهم.

وإحنا الحقيقة عملنا مصنع الطائرات سنة ١٩٦٠ ليه؟ جم الروس سنة ١٩٥٩ واتخانقنا مع الروس خناقة كبيرة فقال الاتحاد السوفيتى مش هيدينا سلاح، وجينا طلبنا ميج ١٩ لأن اليهود جابوا الميراج وقتها ورفضوا حصل رفض بات يعنى!

فعلى هذا الأساس جات فكرة، طب إحنا لازم نعمل مصنع طائرات ولازم نعتمد على نفسنا لأن بدون هذا الوضع هنبقى فى وضع سئ؛ الغرب مابيبعلناش، وكذلك الشرق يبقى لازم نعتمد على نفسنا ومشينا فى المشروع. الحقيقة المشروع فى الأول وأول عملية ليه جت هاتكلف ٦ مليون جنيه، وأنا شوفت مستر شميديت بنفسه فى هذه العملية وإن التصميمات جاهزة، وبعدين عدى المشروع لدرجة أنا جيت من ٣ سنين وقلت: لازم نوقفه لأن دخلنا فى حاجات وعمليات خيالية!

سرى للغاية

أما بنبص لاسرائيل نلاقى إن الموضوع مش ماشى بالشكل ده، هتلاقهم ابتدوا بحاجات صغيرة بتصنيع طائرات ركاب صغيرة وببييعوها فى إفريقيا؛ اللي هم عندهم المطارات مهياش متسفلتة ورمل عايز طائرة تشيل عشرة ينزل فيها وبياخد الـ licence. وبرضه جيت اتكلمت مع الروس إنهم يدونا licence الـ ٢١ ووافقوا، وإحنا هنا ماوافقناش على العملية دى. أما كان هنا كوسيجن وافقوا يدونا الـ licence وهم إدوها للهند وهى بتنتج، وإحنا مامشيناش فى هذه العملية، وكان الفكرة إن احنا هنطلع طائرة مش فاهم إيه وبرضه كل الموضوع خيالى!

فالعلمية مهياش خيال الحقيقة العملية إحنا لازم نعرف قدرتنا إيه وإمكانياتنا إيه، وبعدين إحنا مش هنختر حاجة جديدة؛ لأن وضعيتنا لا تمكنا من إن احنا نختر حاجة جديدة؛ إزاي نعمل مصنع مبيدات مثلا معملناش، ده موجود من عشرات السنين! هى دى الحقيقة الحاجات اللي لازم نمشى فيها ونعملها؛ إزاي نمشى فى الطاقة الذرية بحيث نكون جاهزين فى أى وقت إن احنا نعمل قنبلة ذرية مثلا ونعمل reactor بنفسنا علشان نطلع البلوتونيوم أو كذا. الصينيين مشيوا فى هذه السكة أيضا، ومحدث هيدينا ولا الأمريكان اللي هنا اللي بيقلولوا هيدونا reactor، وده يعتبر إنها لعاشر مرة ببيجوا.. كل دى عمليات تخدير علشان ما نمشى فى سكة نعتمد فيها على نفسنا.

أحمد: لو تسمح لى سيادتك، أنا هاضيف كلمة، أنا كلمت الأخ أمين وبرضه إحنا مش هنختر بل إحنا هنبداً من حيث انتهى الآخرون. إحنا صرفنا على البحث العلمى ٣٨ مليون على أقل تقدير عشان أقدر أتحرك أو أحرك قطار المركز اللي هو ببيخدم قطاعات الزراعة أو الصناعة، والحقيقة أنا محتاج إنى أقول وظيفتى من الأول إننى أوجد الثقة، وأنا واثق إن زملاى الوزرا هيشجعونى فى العملية.

المبيدات الحشرية من سنة ١٩٦١ وأنا عضو فى لجنة المبيدات، وأنا بأنادى ليه أشتري من ألمانيا الشرقية بـ ١٢ مليون؟! فعلا قدرنا ننتج فى دلنا وأنا بالتعاون مع الأخ سيد إن فيه مصنع من المصانع الحربية قد تتجج هذه العملية. دى أنا بعترها نوع من ناحية البحث يجب امتداد تكميل الخبرة اللي سيادتك بتقول عليها، وإن احنا لا يمكن أن نستورد الخبرة. والنهاره حتى فى عملية التصنيع، بعد عملية حق المعرفة أصبح واجب علينا إن احنا نفهم الجزء العلمى بتاع العملية ننقل لحكاية التطوير، وبعد كده أنتقل الى الأخ أمين اللي يصح يكون عنده العملة اللي تساعدنى نكون الخبرة الفنية والعلمية.

سرى للغاية

عبد الناصر: هو أنا بس حبيت أحدد يعنى مش هنخترع الكهريا لأن الكهريا موجودة، لو النهارده مثلا قعدنا نخترع الكهريا يمكن نقعد ١٠٠ سنة منعرفش! (ضحك) وامبارح كان عندى واحد من اليابان اللى هو رئيس شركة البترول، وبيقول لى: إن هم عندهم نقص فى اليد العاملة نتيجة التوسع الصناعى الكبير، وهم النهارده تانى أو تالت دولة فى الدخل القومى بالنسبة للدول الغربية، أمريكا نمرة واحد أظن وهم نمرة اتنين أو أظن ألمانيا الغربية وبعدين اليابان؛ يعنى بقوا فى الدخل القومى أكثر من فرنسا وإنجلترا، وعندهم العملية دى بقالها ١٠٠ سنة أو أكثر؛ الثورة الصناعية بتاعتهم من حوالى يمكن سبعين سنة يعنى من ١٩٠٤.

الحقيقة إحنا مشكلتنا إحنا بنتكلم على تحديد النسل والكلام دا، ودا موضوع برضه عايزين ندخله فى بيان ٣٠ مارس نزوده لكن لازم نتوسع عشان نشغل الناس كلها، ومفيش قدامنا سبيل إلا إذا مشينا زى الطريق اللى مشيت فيه اليابان. الحقيقة طبعا الأمريكان بيعاكسوننا باستمرار لأن هم مش عايزينا نمشى فى هذا الطريق.. ودى المشاكل اللى شوفناها من أول الثورة.

البشرى: كلمة صغيرة يافندم، هو سيادتك اتفضلت بالكلام عن التطوير فى الإنتاج الحربى، هو الحقيقة كان فيه فترة توقف ولكن استأنفناها مع الأخ فوزى من حوالى سنة، وفيه تطوير قائم دلوقتى بالاعتماد على ذاتيتنا، والحقيقة فيه جهد يشكر فى نواحى خاصة بالصواريخ التكتيكية وحاجات نقدر نقول إنها تحت الاختبار، إنما بعضها نجح والبعض الآخر يبشر بنجاح.

فيه تطوير فيما يختص بالمواد الحارقة، ووصلنا الى نتائج تبشر بنجاح كبير جدا فيما يختص بالنواحى الكيميائية والبيولوجية بالتعاون التام مع الجيش والبحث العلمى، ووصلنا الى نتائج فى نواحى كثيرة ذات فاعلية كبيرة فى المواد نفسها وفيما يختص بوسائل الإطلاق والاستخدام، إنما لازال العلم يقف حائل ويأخذ الوقت والجهد الطويل.

إحنا اتفقنا تقريبا على بعض النقاط اللى لو خدنا فيها دفعة يمكن تخلى عملية الإنتاج الحربى تستعيز بعض ما فاتها فى السنوات السابقة؛ على الأخص فى مجال فيما يتعلق بالصواريخ الخاصة بالطيران الواطى وضد الدبابات وبعض أنواع الصواريخ الخاصة بالمدفعية طويلة المدى. والنواحى دى كان فيه اتفاق كامل بين الأخ فوزى والمارشال جريتشكو وسيادتك تفضلت واستعجلت الروس، فأنا بأرجو إننا نستعجلهم ونقعد معاهم شوية زيادة عشان نقدر ناخذ هذه العملية.

سرى للغاية

الإنتاج الحربى التقليدى فيه توسع كبير، لأن الأوامر اللى إحنا واخدينها دلوقتى بنشتغل فى حدود ١٦ مليون جنيه السنة دى اللى احنا فيها؛ السنة اللى فاتت كان ٨ والسنة اللى قبلها كان حوالى ٥ مليون جنيه. فدلوقتى فيه تقدم فى هذا الموضوع إنما ما نقدرش نقول إن فيه اقتناع بهذا؛ لأننا من سنة ١٩٥٨ مزادش علينا غير الحاجات اللى هتطلع قريبا مثل الجرونوف والقناعات الواقية، ماعدا ذلك مزادش علينا فى الإنتاج التقليدى شىء جديد.

نرجو إن احنا نهم شوية فى موضوع الصواريخ، والموضوع بتاع الكيمياء والبيولوجى مالناش سبيل غير الاعتماد الذاتى والتعاون المثمر بيننا إحنا الثلاثة فى صمت. والعملية ماشية مش بطالة، والدكتور أحمد مصطفى كان فى المركز وشاف بعض الحاجات اللى تبشر بالخير إن شاء الله.

رفعت: كان فيه برضه موضوع خاص بوزارة التربية بالنسبة للبعثات التعليمية فى الخارج والمعاملة المالية بتاعتهم، لاحظت وأنا فى ليبيا يبدو إن كان فيه اتفاق إن بعثاتنا التعليمية لما بتعار هناك هنا بياخدوا مرتب ثم بيكمل هناك. ويبدو إنه اتخذ إجراء هنا بقطع المرتب هنا، ولم يتم الاتصال بالحكومة الليبية لتعويض الجزء اللى هى بتدفعه. وكان النتيجة إن هم مبيأخدوش مرتبات من هنا، وبس بياخدوا نصيب الحكومة الليبية دون أن يزداد الى الحد اللى المفروض يكون موجود فيه.. ودا عايز اتصال يمكن على مستوى الوزارة فى هذا الأمر.

عبد الناصر: هتلاقى الحكومة الليبية عايزة تمشى المدرسين الموجودين عندها!

مراد: هى كده.. هى دلوقتى بتحاول إنها تتخلص من الموجودين عندها. إحنا بنحاول هو كان صدر قرار جمهورى بمنع صرف المرتبات للموجودين فى ليبيا فى الداخل؛ على أساس إن العملية كانت تنظيمية قبل أنا ماجى وزارة التربية والتعليم، على أساس انه ليبيا هترفع المرتبات بالمقارنة بغيرها من الدول العربية، وبعدين اللى حصل إن ليبيا مرفعتش المرتبات؛ ولذلك هم بيطالبوا بإعادة النظر فى هذا القرار الجمهورى. إحنا بندرسها على أساس مقارنة بين الدول العربية، إذا كانوا هم رغم انقطاع مرتبهم هنا بياخدوا مرتب كبير يوازى اللى بياخدوه زملاؤهم فى الكويت أو غيرها من الدول العربية، هنفهمهم هذا. والجزائر كذلك إذا كان أقل من زملائهم يعنى نطلب من سيادتكم إن احنا نعدل هذا القرار الجمهورى، وفيه دراسة خاصة بهذا الموضوع.

سرى للغاية

رفعت: هو تقديرى هم هناك يعنى غصب عنهم مش هابقدرنا يمشوهم سواء العمال أو الفنيين؛ لأن ثبت حتى التجربة اللي فاتت إنهم جابوا عمال من بره.. السودان ومالطة معروفش يشتغلوا! وهناك رجال الأعمال نفسهم بيطلبوا بعمال وفنيين مصريين وبيتمسكوا حتى بالمعاريين اللي موجودين مش عايزين يتركوهم.

عبد الناصر: لكن هي السياسة الأمريكية بالنسبة لليبيا عايزين يخلصوا من كل المصريين الموجودين هناك، ومش عايزين مصريين تانى. دا أيضا الوضع دا هناك ماشيين فيه بالنسبة للسعودية لكن أكثر بالنسبة لليبيا. وبعدين حتى المشروعات، يعنى إحنا النهارده شركات المقاولات بتقدر تاخذ فى ليبيا مشروعات كتير؛ لأن عندهم الحقيقة مشروعات كتيرة جدا وميزانيتهم السنة دى حوالى ٥٠٠ مليون جنيه، كانت الأول ٦ مليون جنيه. وبعدين الوزرا هناك الحقيقة بياخدوا الفلوس، وكنت قايل قبل كدا لو العملية عايزة دفع فلوس، فالشركات بيبجوا وياخدوا ١٠ آلاف جنيه ويمشوا العملية عشان نشغل شركاتنا.

مراد: بعد إذن سيادك، كان وكيل وزارة الأشغال الليبية كان طالب استثناء فى سنة دراسية، وكان عثمان أحمد عثمان كلمنى عشان يديله المشروع؛ تمسكت أنا بسمعة التعليم! (ضحك)

أصوات: (ضحك)

عبد الناصر: يعنى هو إحنا الحقيقة لما سألوني فى الموضوع إن الوضع بيستدعى دفع، قال لى أمشى بقى يعنى دغرى ولا لآ؟! وهو الأسلوب الحقيقة مع إن هم دلوقتى الفنيين ميباخدوهمش من عندنا، وبالنسبة لموضوع المعلمين نشوف الوضع إيه.

مرعى: والله لو سمحت لى سيادتك بالنسبة لموضوع ليبيا، فيه شئ من التركيز على مستوى سياسى فى ليبيا، بأنه مثلا من الحاجات اللي هم طارحينها عدد كبير جدا من الآبار الإرتوازية، فى الوقت اللي شركة رجوا هنا متمرنة تمرين من أحسن مايمكن، ولها تجربة الآن فى السودان ودخلت فى مناقصة كبيرة طويلة عريضة ورسيت عليها فى السودان وكانت فى مدة بسيطة، ومع ذلك قامت بيها والشركة على وشك التصفية هنا لأن مالهاش أعمال فى مصر.

سرى للغاية

ففيه مجال من ناحية الآبار الإرتوازية، وفيه مجال زى ما حضرتك ذكرت من ناحية المقاولات. وبعدين هم عايزين يعتمدوا الناحية العلمية فى مجال الزراعة أيضا، مش ممكن تعتمدوا على مجال البترول بس ولازم تعتمدوا على الزراعة، وأنا شايف إن فيه اهتمام من التقارير اللى بتيجى لنا فى الناحية الزراعية. إنما لما بنقيس حجم العمل، وأنا شوفت عثمان أحمد عثمان يمكن فى أكثر من قعدة، وكان لى بعض المحاولات إنى أودى رجوا؛ مابنجدش إنهم ياخدوا عمال مصريين هناك، بس فمش عارف إذا كان على مستوى الأخ رياض أو على مستوى سياسى..

عبد الناصر: إحنا بعتنا حسين الشافعى هناك، فهم خايفين منا جدا.. الحقيقة هو دا الوضع هناك، وبعدين الوزرا ببيجوا زى الوزارات اللى كانت عندنا هنا، تبقى مع والتر سميث ولآ مش فاهم إيه المستشار الشرقى بيسطر عليهم.. فهم النهارده بيمروا بهذه المرحلة. ويعنى لما راح حتى حسين الشافعى مقابلوش حتى البكوش اللى هو كان رئيس وزارة والواحد ماسمعش عنه! فالعملية لازم تمشى طبيعية، إحنا غيرنا السفير هناك.

رياض: لو سمحت سيادتكم، يمكن النقط اللى اتكلموا عليها فى موضوع وزارة الخارجية، الحقيقة لأنه ممكن برضه الجهاز السياسى يساعد فى الحاجات دى فى ليبيا؛ فيه ناس بتروح مش مابيروحوش ففيه أساليب كثيرة للتعيين. أنا بشوف عمال كثير وفيه مهندسين بيسافروا وبيطلبوا القطاعات خاصة، وبتوع المطبعة فيه عدد كبير راح وأعيروا من المطابع هنا للمطابع فى ليبيا؛ فبياخدوا ناس لأنهم مش لاقيين غير من مصر.

عبد الناصر: ماهو مش معقول يجيبوا واحد صينى يطبع له عربى يعنى! (ضحك)

رياض: فعلا والشعب هناك مشاعره طيبة بالنسبة لنا.

عبد الناصر: ده برضه بيضايقهم!

رياض: فعلا.. ولكن عن طريق المشاعر الطيبة فيه ناس بتشتغل وناس بتتعين يعنى حكاية الشركة بتشتغل، فممكن إن بذل الجهد.. فبكوش مثلا كان إنسان سخي فمشى، فممكن لو حسنا العلاقات تانى مع الملك تدريجيا ممكن نوصل لنتائج مع منتصر اللى قاعد فى الديوان، ونهياها برضه بطريقة ما ممكن إن احنا نحقق معاهم أشياء.

سرى للغاية

والحقيقة بشكل عام - ودى ملاحظة كنت هاتكلم عليها - مفيش تنسيق بين وزارة الخارجية وقيت الوزارات، مفيش جهاز ينظم لهذا التنسيق. وبنلاحظ إن السفير الهنـدى لو فيه حاجة صغيرة جدا لأى عمل بخصوص الهند بيروح للوزارات المختصة وبيقابل المسؤولين، وكل الدول.. اليوغسلافى والبلغارى. إحنا سفارتنا الحقيقة معندهاش معلومات ولا عندها خبر إطلاقا عن الناس اللى بتسافر! وبيحصل كتير ناس بتسافر وبتحاول تعمل حاجة والسفير مبيقاش عنده فكرة عن الموضوع؛ فالسبب إن مفيش تنسيق بيتدى من الوزارة نفسها أو من الوزراء، أنا معنديش فكرة عن هذه الأشياء!

يعنى النهارده مثلا الأخ وزير الإسكان كلمنى عن مشروع فى الكويت هيبـت فيه خلال ٤٨ ساعة، فبعت برقية للسفير. إنما الطبيعى لو عندى مثلا فيه لجنة وزارية تبحث كل موضوعاتنا ونشاطنا فى الخارج، وبتتوفر المعلومات للجهاز السياسى؛ مابقولش إنهم هيحلوا كل المشاكل مستحيل، إنما على الأقل يحاول يعمل حاجة. إحنا محتاجين جهاز على المستوى الوزارى، حتى إن الجهاز نفسه فى وزارة الخارجية يبقى عنده فكرة عن نشاطنا فى الخارج بحيث نقدر نكيف الجهاز، يصح فى بلاد موجودين ومايبعملوش حاجة أو لهم نشاط سياسى محدود؛ وعلى هذا نخليهم يعملوا فى كل الميادين وكل أفرع النشاط الاقتصادى، ودى محتاجة لتنظيم صغير داخل الوزارة نفسها.

عبد الناصر: هو الأمريكان لما حد بيبجى منهم ويتكلم فى موضوع، بيقولوا كدا بصراحة: إن هو بيتكلم فى هذا الموضوع لكن ميقدرش ينفذه إلا إذا خد تصريح بيه من وزارة الخارجية فى كل المجالات. فالحقيقة التقصير منكم إنتم مش من الوزارات، وإنـت فى أول ما تعينت وزير الخارجية اتكلمنا فى هذا الموضوع والناحية الاقتصادية والنواحى الثانية، وقلت: إنك هتعمل فى الوزارة وماتعملش!

رياض: المشكلة عندى فى الوزارة إن المطلوب إنى أعرف طيب هعرف إزاي؟! ودى شكوى مش بس من عندى؛ يعنى فيه شكوى مثلا وزير الاقتصاد بيشكو من إن النواحى الاقتصادية مابتمرش عن طريق وزارة الاقتصاد.. يعنى فيه شكوى عندى فى سفاراتى إن البيانات الاقتصادية بتاعتنا وعلاقاتنا التجارية مع الدول مختلفة، يعنى البنك المركزى عنده بيانات والسفارة عندها بيانات ومختلفة تماما! تتذكر سيادتكم مشوار موسكو، البيانات معايا ورحت قابلت كوسيجن ويقول له: موقفنا كذا من الأشياء اللى حصرناها، وبعدين هو رد على وصح لى المعلومات اللى جاييها له! وده دليل إن البيانات الموجودة عندنا مهياش مركزة!

سرى للغاية

فاليانبات مش مركزة واللى ينقصنا لجنة وزارية موجودة للعلاقات الخارجية؛ بحيث إن أى عمل فى الخارج يمر على هذه اللجنة، فإن لو مفيش إرغام على اللجنة دى توافق محدش هيخطرني بالموضوع. فمفيش ربط عندنا غير فقط فى الناحية الثقافية لأن اتشكلت لجنة برئاسة وكيل الوزارة وفيها كل الوكلاء للوزارات المعنية فقدرنا وتوصلنا الى الوضع إيه؛ فلو أثير موضوع التعليم أو غيره ممكن اللجنة دى فيه جهاز موجود يقدر يبحث ويدينا رأى السليم، فيما عدا هذا فى كل النشاط الاقتصادى مفيش!

فأنا محتاج الى لجنة وزارة اقتصادية، وده من ضمن النقط اللى ممكن تدخل فى مجال التغيير مش بس فى الأشخاص إنما فى طريقة العمل، محتاجين الى ربط فيما يتعلق بالعلاقات الخارجية كلها ولجنة للإعلام اللى حصرنا الوضع التعليمى من خلالها دى فقط، فى كل أفرع النشاط الاقتصادى زى معظم دول العالم، ومحتاجين أيضا تغيير فى أسلوب العمل ولجنة للتنسيق ما بين الخارجية والاعلام.

عبد الناصر: قدم مشاريع.

سليمان: لا شك إننا سعداء إن وزارة الخارجية بتساعد فى كافة النواحي، وفى الواقع السفارات فى الخارج برضه مهتمة بالعمل السياسى على حساب الأنواع الأخرى من النشاط يعنى المسائل الاقتصادية والمسائل التجارية، يجب إنها تدى معونة فيها ولو بالمعلومات زى النشاط الخارجى للشركات بتاعتنا وزى مسائل الهجرة وغيره لإتاحة فرص أكثر. هل دا هيكون بتكوين أجهزة هنا فى وزارة الخارجية ولأ إن السفارات تعرف إن دا جزء من واجبها ولا بد إن يهتموا بيه؟

عبد الناصر: هو لازم يكون فيه حاجة تلم المواضيع دى كلها يافى وزارة الخارجية زى ما هو موجود فى أمريكا بالجنة زى الموجودة فى الاتحاد السوفيتى لجنة العلاقات الخارجية للشئون الاقتصادية، ومعاها مساعدين فى كل البلاد.. فى غانا فى مصر من هنا هنا. وإحنا اللى ملخبطنا ومدخلنا فى المديونيات اللى مش متوازنة إن كل واحد بقى بيشتغل لوحده. وإحنا قلنا: بنلم العمليات دى فى اللجنة الاقتصادية بحيث محدش ياخذ قرض إلا إذا اتصدق عليه؛ عشان نعرف هندفع كام سنة كام.

سرى للغاية

برضه دا موضوع لسه مانعرفوش لغاية دلوقتى! وفى نفس الوقت إذا كنا عايزين نشغل السفارات؛ يعنى أنا مثلا شوفت مرة سفير الدانمارك موجود فى إثيوبيا، وقال لى: لازم السفارة تجيب مصاريفها وأكثر من البلد بالنسبة للعلاقات التجارية، وإلا يبقى مفيش فائدة فى السفارة بيقلوها. وهو كان فى إثيوبيا ولازم يجيب ولو يصدروا جينة لاثيوبيا، ويجيب تمن مصاريف السفارة وشوية ربح. وهو الحقيقة النهارده المهمة الأساسية للسفارات لأن العمل السياسى بنقوم بيه إحنا ووزير الخارجية بيقابل الناس ويحضر اجتماعات ويبروح يزور البلاد، ويبقى العمل السياسى جزء لكن العمل الاقتصادى هو أهم؛ ودا بيعوز الحقيقة إن الخارجية تبقى عارفة وبعدين اللجنة تطلع توجيهات.

رياض: مش هتنشئ أجهزة إطلاقا، تتذكر سيادتكم لما اتلغت وزارة الاقتصاد سيادتكم قلت: حتى تخلوا الوزارة، أنا مخدتش حد أبدا وباللجنة الموجودة فى الخارجية وفيه إدارة اقتصادية أصلا وفيه إدارة صحافية؛ ودا مش محتاج أجهزة جديدة، فهى كلها عملية تنسيق ونشغل الـ ١٠٠ بعثة فى الخارج لخدمة الاقتصاد القومى. دى تحتاج إن احنا نوجه الناس ونقول لهم: المطلوب منكم كذا، تعملوا دراسات عن الأسواق من خلال التوجيهات والا مفيش داعى لوجودهم الحقيقة ونسحبهم.

سليمان: أيضا لازم يكون التعامل فى وزارة الخارجية بطريقة لامركزية، يعنى المراسلات تكون غير متوقفة على الحقيبة الدبلوماسية اللى بتأخذ وقت وتكون عن طريق السفارات نفسها. وبعدين فى علاقاتنا بالدول العربية ودا المجال بتاع النشاط الطبيعى بتاعنا، إحنا دلوقتى بنمشى بطريق التسلل أكثر من الطريق الرسمى؛ يعنى الشركة لما بتقدر تروح تأخذ عملية بوسائلها الخاصة يمكن السفير يتكلم فى الموضوع يعقدوها أكثر! وبعدين العمليات لو كانت مش نظيفة ماندخلش السفير بتاعنا فيها. فى الكويت خدوا العملية ومامشوهاش لأن كان فيه اتفاق يدفعوا ١٠ آلاف جنيه، فأوقف أمر العمل إلا لما يدفع الـ ١٠ آلاف جنيه من هيئة قناة السويس، فاضطر إنه يروح بيبقى له وكيل هناك واضطر الوكيل ينط الناحية الثانية! الأمثلة كثيرة.

عبد الناصر: الساعة ٩ هنمشى على أى حال من الأحوال.

سرى للغاية

كامل: متابعة للكلمة اللى قالها السيد الدكتور أحمد مصطفى فى البحث العلمى ويمكن هى إضافة المنهج العلمى الى جانب البحث العلمى؛ نحن ينقصنا الى جانب البحث العلمى المنهج العلمى، وعملية تطبيق المنهج العلمى يمكن أن تكون أولاً على مستوى العلاقات بين الوزارات وبعضها البعض. لحد النهارده لما نيجى نشوف منهجية البحث فى علاقتنا مع بعضنا هنلاقيها الى حد بعيد جداً مفقودة، وهذه المنهجية إذا ما توفرت على مستوى الوزارة الواحدة ثم على مستوى العلاقات بين الوزارات، ممكن جداً تحل كثير من المشاكل. وهادى مثال تطبيقى على ذلك، أتصور مثلاً فيما يتعلق بتخطيط العمل وزارى وتعامل البحث العلمى بمنهجية علمية والتخطيط فيه على بيان علاقات الوزارات ببعضها البعض بصفة عامة، ثم بعد هذا تتكون لجان فرعية تخطط للمنهج العلمى لكل وزارة من حيث علاقاتها الخارجية والداخلية. وبعدين إن نفس المنهج هو بطبيعة الحال لا بد أن يكون موجود فى ذهن الأفراد فى حياتهم اليومية؛ فهيكون عندنا على المستوى الحكومى وينبغى أيضاً أن يكون على المستوى الشعبى. وفقد المنهج العلمى عند الفرد يؤدى الى عدم تخطيط هذه الحياة، ويؤدى الى حدوث كثير جداً من المشاكل اللى ممكن تظهر فى كل مناحى وفروع الحياة. ويمكن لو طرح تعاون بين الأخ أحمد مصطفى مع الأخ جاب الله على وضع تخطيط عام للتعاون فيما بين الوزارات على أساس منهجية العلاقات نفسها.

عبد الناصر: على العموم إحنا هنخليك مسئول الاستمرار عن متابعة بيان ٣٠ مارس، وتأخذ المنهجية والبحث بتاعك وتعملوها وزارة يعنى! (ضحك)

مراد: هو الحقيقة عمل شاق وأرجو إن السادة الوزراء يقدروا يعنى.

عبد الناصر: مقدرين يعنى أنا مختلف معاك فى نسبة ٩٩,٥، وهائيت لك فى آخر المناقشة إن هذه النسبة مش صح. إنت بنقول إن اللى لم ينفذ من بيان ٣٠ مارس ٩٩,٥، هذا الكلام غير حقيقى لعدة أسباب: هو بيان ٣٠ مارس كان مركز على ٣ موضوعات.. أول حاجة المعركة، وبعدين الاتحاد الاشتراكى، وبعدين العمل الداخلى. فبالنسبة للمعركة: العملية ماشية زى ما الواحد ما خطط لها زى ما يتمنى أو أحسن.

سرى للغاية

بالنسبة للاتحاد الاشتراكي: مشينا فى العملية وكملناها ١٠٠٪، اللى هو البرنامج التنفيذى اللى هو الجانب الأول فى بيان ٣٠ مارس وهو الحشد وهو اتنفذ والعملية ماشية، وإن ميكونش هناك صوت أعلى من صوت المعركة ضرورات المعركة.. كل دا ماشى العمل السياسى ماشى القوى الشعبية العربية.

الجانب الآخر: هو تعبئة كل الجماهير من الطاقات والإمكانيات، حشد كل القوى الشعبية بوسيلة الديمقراطية، ثم الاتحاد الاشتراكي ونعيد بناء الاتحاد الاشتراكي.. كل دا اتنفذ. تجرى الانتخابات للوحدات التأسيسية للاتحاد الاشتراكي العربى، وتندرج الانتخابات حتى تصل الى المؤتمر القومى للاتحاد الاشتراكي، الذى ينتخب بدوره اللجنة المركزية، التى تنتخب بدورها رئاستها وهى اللجنة التنفيذية العليا للاتحاد الاشتراكي العربى، وضع مشروع الدستور الدائم دا على أساس بعد آثار العدوان. وبعدين اللجنة المركزية سوف يكون عليها غير واجباتها المحددة فى الاتحاد الاشتراكي عدة مهام إضافية هى: بناء التنظيم السياسى لطلائع الاتحاد الاشتراكي، وتحديد مهام العمل الوطنى للمرحلة الجديدة والتنسيق بينها.. كل دا اتعمل.

بعدين المهام الرئيسية: لكى يكون هناك ضوء كاف على طريقنا، فإننى أريد من الآن أن أضع أمامكم تصورى لبعض المهام الرئيسية فى المرحلة القادمة من نضالنا: تأكيد وتثبيت دور قوى الشعب العاملة وتحالفها وقياداتها فى تحقيق سيطرتها بالديمقراطية على العمل الوطنى فى كافة مجالاته. تدعيم عملية بناء الدولة الحديثة فى مصر، والدولة الحديثة لا تقوم - بعد الديمقراطية - إلا استنادا على العلم والتكنولوجيا؛ ولذلك فإنه من المحتم إنشاء المجالس المتخصصة على المستوى القومى سياسيا وفنيا لكى تساعد على الحكم.

الحقيقة اللى مخلينى متردد فى المجالس المتخصصة، يوم السبت هنا الأحد اللجنة التنفيذية العليا، بعدين يوم الأربعاء اللجنة المركزية، مجلس الدفاع القومى يوم الثلاثاء. وبعدين الحقيقة عايزين أفكار على المجالس المتخصصة وبرضه اقتراحات.

مجلس اقتصادى قومى؛ يضم شعبا للصناعة والزراعة والمال والعلوم والتكنولوجيا.. دا لسه ماتعملش.

مجلس اجتماعى قومى: يضم شعبا للتعليم والصحة وغيرها مما يتصل بالخدمات المختلفة.

مجلس ثقافى قومى: يضم شعبا للفنون وللآداب وللإعلام.

سرى للغاية

هو الحقيقة لما هنعمل المجالس دى؛ المجلسين الموجودين النهارده الحقيقة لازم نفكر فيهم؛ لأنهم بقوا عملية تكاية لوظائف ولم يحققوا الهدف! وأنا يوم ما اقترحت دول، أنا قلت: إن الجمعية الملكية فى بريطانيا عملت عمليات مفيدة للغاية مش بس لإنجلترا بل للعالم بالنسبة لتسجيل الاختراعات بالنسبة للبحوث وغيره؛ تعالوا نعمل مجالس بدل ما نعمل أكاديميات زى ما هم عاملين كدا، وعملنا المجالس ومأدنتش العملية إلا أنهم بيقرروا جوائز الدولة التقديرية وواخدين العملية بالأقدمية! وبعدين إعطاء التنمية الشاملة، دول عايزين اقتراحات منهم برضه، عايزين الأخ مراد يلم العمليات دى ويقدم لنا اقتراحاته عشان المجالس دى إحنا ملزمين إن احنا نعملها.

إدارة المشروعات العامة إدارة اقتصادية وعلمية: ومشينا فى الخطة على أساس إن هدفنا ٥٪.

العمل على تدعيم القيم الروحية والخلفية والاهتمام بالشباب وإتاحة الفرصة أمامه للتجربة.. وأظن هذا الموضوع أيضا مشينا فيه.

إطلاق القوى الخلاقة للحركة النقابية سواء فى نقابات العمال أو المهنيين: ودلوقتى فتحنا للمهنيين وبعد مجلس الأمة يناير بنفتح العملية للعمال.

تعميق التلاحم بين جماهير الشعب وبين القوات المسلحة: النكت والكلام ده انتهت والناس متبعة العمليات دى.

توجيه جهد مركز نحو عمليات البحث عن البترول لما أكدته الشواهد العملية من احتمالات بترولية واسعة فى مصر.. ودا ماشيين أيضا فيه.

توفير الحافز الفردى تكريما لقيمة العمل من ناحية، واحتفاظا للوطن بطاقاته البشرية القادرة وإفراح فرصة الأمل أمامها؛ هو صدقى بقاله سنتين بيتكلم على الحوافز ومستنيين.

سليمان: هو إن شاء الله.

عبد الناصر: تحقيق وضع الرجل المناسب فى المكان المناسب: وده موضوع بقى الحقيقة كل واحد له رأى ومحدث هيرضى على حد والعملية فى هذا مهياش عملية سهلة.

ضمان حماية الثورة فى ظل سيادة القانون: ولعله يكون مناسبا أن تقوم اللجنة المركزية بتشكيل لجنة خاصة، ويكون لهذه اللجنة حق نظر كل الإجراءات التى ترى السلطة اتخاذها لدواعى الأمن الوطنى فى الظروف الراهنة.. فى اللجنة المركزية دا هنعمله لكن

سرى للغاية

لسه الحقيقة القوانين اللى اقترحوها فى مجلس الأمة ومجائش فى بيان ٣٠ مارس، الحاجات اللى هيتضمنها الدستور دى عملية الحقيقة باعتبارها مؤجلة.

تحقيق وتأكيد الانتماء المصرى الى الأمة العربية تاريخيا ونضاليا ومصيريا، وحدة عضوية فوق أى فرد وبعد أى مرحلة.

حماية كل المكتسبات الاشتراكية وتدعيمها بما فى ذلك النسبة المقررة بالميثاق للفلاحين والعمال فى كل المجالس الشعبية المنتخبة، واشتراك العمال فى إدارة المشروعات وأرباحها، وحقوق التعليم المجانى والتأمينات الصحية والاجتماعية، وتحرير المرأة، وحماية حقوق الأمومة والطفولة والأسرة.

الصلة الوثيقة بين الحرية الاجتماعية والحرية السياسية، وأن تتوفر كل الضمانات للحرية الشخصية والأمن بالنسبة لجميع المواطنين فى كل الظروف، وأن تتوفر أيضا كل الضمانات لحرية التفكير والتعبير والنشر والرأى والبحث العلمى والصحافة.

قيام الدولة العصرية وإدارتها، لأن الدولة العصرية لم تعد مسألة فرد ولم تعد بالتنظيم السياسى وحده وإنما أصبح للعلوم والتكنولوجيا دورها الحيوى؛ ولهذا فإنه يجب أن يكون واضحا أن رئيس الجمهورية يباشر مسئولية الحكم بواسطة الوزراء وبواسطة المجالس المتخصصة التى تضم خلاصة الكفاءة والتجربة الوطنية، بما تحققة إدارة الحكومة عن طريق التخصص واللامركزية.

تحديد واضح لمؤسسات الدولة واختصاصاتها، بما فى ذلك رئيس الدولة والهيئة التشريعية والهيئة التنفيذية. ومن المرغوب فيه أن تتأكد سلطة مجلس الأمة باعتباره الهيئة التى تتولى الوظيفة التشريعية، والرقابة على أعمال الحكومة، والمشاركة فى وضع ومتابعة الخطة العامة للبناء السياسى والتنمية الاقتصادية والاجتماعية. كذلك فإن من المرغوب فيه إفساح الفرصة لوسائل الرقابة البرلمانية والشعبية لتحقيق حسن الأداء وكفالة أمانته.

تأكيد أهمية العمل باعتباره المعيار الوحيد للقيمة الإنسانية.

ضمانات حماية الملكية العامة والملكية التعاونية والملكية الخاصة، وحدود كل منها ودوره الاجتماعى.

حصانة القضاء، وأن يكفل حق التقاضى، ولا ينص فى أى إجراء للسلطة على عدم جواز الطعن فيه أمام القضاء؛ ذلك أن القضاء هو الميزان الذى يحقق العدل ويعطى لكل ذى حق حقه، ويرد أى اعتداء على الحقوق أو الحريات.

إنشاء محكمة دستورية عليا، يكون لها الحق فى تقرير دستورية القوانين وتطابقها مع الميثاق ومع الدستور.

سرى للغاية

حد زمنى معين لتولى الوظائف السياسية التنفيذية الكبرى، وذلك ضمانا للتجدد وللتجديد باستمرار .

هو دا بقى بيان ٣٠ مارس! (ضحك)

أصوت: (ضحك)

مراد: أنا ما قصدتش البيان، أنا قصدت تقرير اللجنة الوزارية بس مرضيتش أقاطع سيادتك، أنا مرضيتش أقول البيان فى مجموعه!

عبد الناصر: لكن هو الكلام إن بيان ٣٠ مارس لم ينفذ منه ٩٩,٥%! فالحقيقة مانقدرش نقول: إن بيان ٣٠ مارس لم ينفذ منه أى شىء. فالبيان.. عملية الاتحاد الاشتراكى مشيت، عملية القوات المسلحة مشيت، ضرورة التنمية وزيادة الاستثمارات مشيت.

اللى ناقص عملية المجالس المتخصصة ومجلس الدفاع، والجمعة دى هنطلع قرار خاص بمجلس الدفاع. وأنا الحقيقة مأقدرش أطلع قرار بالمجالس المتخصصة، دى عملية معقدة مش سهلة وفيه ناس فى اللجنة المركزية متهبألى الأخ صدقى يقدر يعمل لنا العملية دى. وإنك عايز هنا ٣ مجالس فبتقولوا لنا إيه اختصاصات المجالس؟ مين الناس اللى هنحطهم فيها؟ وخذوا شهر فى العملية دى.

بعدين الكلام بقى بتاع المتابعة بنستمر فى المتابعة فى التقرير دا لأن الحاجات دى اتكلمنا فيها، وبعد شهر نتابع إيه اللى حصل وإيه اللى ما حصلش.

حجازى: كلمة بسيطة يافندم، طبعا هو البرنامج كان موسع وبالتالي التقرير جاء ليحكم على برنامج موسع لا يمكن تنفيذه فى خلال فترة قصيرة على أى حال.

الحاجة الثانية: فى اعتقادى إن البعض مقدمش إيه اللى نفذ بالضبط من الكلام المكتوب، فيمكن مكانش مفهوم ما تم وما لم.

وبعدين معظم البرامج الموضوعية طويلة الأجل مش قصيرة الأجل، فأرجو الحقيقة من ممارسة الكام شهر اللى فاتوا؛ إحنا فى دوامة لجان يافندم.. بتستغرق مننا وقت غير عادى!

عبد الناصر: وبعدين مبتبتوش وبتأجلوا المواضيع، الحقيقة لما باشوف كلام اللجان بتتكلما كثير جدا بعدين المواضيع ما بيتبتش فيها وبتتأجل! مثلا فيه القانون بتاع معاملة المدنيين زى

سرى للغاية

العسكريين اللى بيموتوا، أنا طالبه انسحب ورجع.. انسحب ورجع! والحقيقة الناس لهم حق يقولوا: واحد واقف فى السويس فى الزيتية ومات مش عسكرى، ليه ده ميتعاملش زى ده؟! أنا مش فاهم إيه الموضوع هو الموضوع مش معقد الى هذا الحد! الواحد لو يجيب المستشار القانونى ويقول له: حظ الموضوع ده يتخط، فى نص ساعة العملية بتخلص! كنا بنشتغل كده زمان فى الأول سنة ٥٦، ٥٧، ٥٨، وكانت اللجان بتبت وساعات مكناش بنجمع مجلس وزراء وبنعتمد على اللجان. اللى أنا ملاحظه النهارده فى اللجان المواضيع بتقعدوا تتكلموا وقت طويل جدا وتقعدوا ساعات وده يتأجل ٣ أسابيع وأسبوعين ومانبتش! زى موضوع الزيتيه اللى أنا طالبه ولم ينفذ، مش فاهم ليه؟

حجازى: يافندم هو أسلوب العمل نفسه فيه قصور، إحنا يمكن اللجنة التشريعية الأسبوع دا شايفين إن احنا وقتنا مستغرق من ١٠ الى ٣ ساعات ومن ٦ الى ٩ الى ١١، وبرضه حصيلة اللجان، مهياش بالقدر الواجب أن يكون، وفيه مسائل تفصيلية كثيرة تعرض على اللجان، وفى حالة الخلاف تعرض على مجلس الوزراء بيتبت فيها.

الحاجة الثانية يافندم، طبعا دا البرنامج تنفيذى موسع وأضاف مفيش فيه شك أمل كبير، فيه مسألة أولويات فيه يعنى العملية برضه عايزة إننا نركز على بعض المواضيع المتماسكة بين الوزارات، ودى بتناقش فى اللجان، إنما داخل كل وزارة قطعا كل وزير بيحط لنفسه خطة ويحاول ينفذها، وفيه مشاكل داخلية مش من السهل إنها تتحل. أعتقد إن اللجان الموسعة فى حاجة لإعادة النظر فيها.

اللجنة التشريعية، أفهم إنها تنظر للقوانين فى ضوء الفلسفة العامة للدولة، ولكن تعرض المشروعات وترجع تانى؛ فبقى فيه نوع من التكرار والإزدواجية.

عبد الناصر: هو إحنا الحاجات اللى بتنظرها اللجنة التشريعية دلوقتى الحقيقة زمان كنا بننظرها فى مجلس الوزراء، والوضع الطبيعى لأى قانون إن مجلس الوزرا يوافق عليه، ولكن اللى سبق إن الوزرا مكانوش ببيجوا قاريين إلا المواضيع اللى تخص وزاراتهم، ونبص نلقى المناقشة ماشية بين واحد أو اتنين بس أو بينى وبين الوزير، وبعدين أصبح الموضوع ممل فى مجلس الوزراء والورق تكاثر وقلنا بنعمل اللجنة التشريعية، أما مواضيع القوانين أساسا بناخذ الموافقة على المبدأ من مجلس الوزراء ثم مناقشة القانون وصياغته ومواده بيروح اللجنة التشريعية.

وليه العملية بتطول؟ لأن الوزارة بتجيب القانون ومفيش اتفاق على مبدأ ولا على حاجة! فيبتدى عايزة اختصاصات من وزارة ثانية والوزارة الثانية بتقول: لا! وبالتالي رئيس

سرى للغاية

اللجنة بيىرى إن أحسن وسيلة بنؤجل؛ فإذا كان عندك اقتراحات بالنسبة للجان إبقى قدمها لنا.

حجازى: أنا شايف يافندم إن الدولة مستقرة تنظيميا، يعنى فيه استقرار أكثر من ٧٠ أو ٨٠٪ والمشاكل المتعلقة بسيطة جدا؛ فلو تركز اللجنة - التنظيم والإدارة - على بعض الموضوعات اللى اتقدمت بناء على عمليات الإصلاح اللى دايرة، بنقدر نخط خط يافندم وينفذ وبعدين ممكن نتفرغ للمواضيع. إحنا دلوقتى فى اللجنة التشريعية والتنظيم والإدارة يمكن مواضيع خاصة بالدرجات والحاجات دى، وإحنا بنفاوض رئيس اللجنة ما دام فيه جهاز مركزى ووزير خزانة والوزير المختص بيتفقوا الموضوع بيمشى. واللجنة التشريعية عايز ناس قانونيين وسكرتارية فنية فى صياغة القوانين وأكثر من ٧ - ٨ - ١٠ وزرا قاعدين زى ما سيادتكم تفضلت وقلت.

وإحنا قلنا: هناقش هذا الموضوع مع الأخ كمال رفعت فى الجلسة اللى جاية، لكن التجربة العملية أثبتت إن فيه مواضيع كتيرة متعطلة، ويمكن الزميل عبد السلام بدوى قال المرة اللى فاتت: فيه ٢٠٠ موضوع محجوزين للعرض على اللجنة التشريعية بقالهم كذا شهر! معنى كذا الحركة بطيئة.

عبد الناصر: وبعدين لو أعضاء اللجان يختصروا كلامهم ٧٥٪ ثم ٥٠٪ ثم ٣٠٪، ولو طبقنا الكلام دا فى مجلس الوزراء يبقى كويس قوى! (ضحك) أنا فاهم قانون التعليم العام بتاع اللجنة المركزية لسه بيقولوا كانوا اتكلموا معاك ولسه عايزين يناقشوا الموضوع!

مراد: هو السيد عبد المحسن أبو النور طالب مذكرات وقوانين منها قانون التعليم.

عبد الناصر: لكن هل اتقابلتوا ولا لأ؟

مراد: لأ.. لسه هو طلب بس الورق.

عبد الناصر: لهذا أنا الحقيقة مش مستعجل على القوانين، ويقول: بتخلص مع اللجنة المركزية قبل يوم الأحد؛ لأن الحقيقة كنت كلمته على القوانين دى من مدة على أساس بتبقى للجنة المركزية رأى وإلا يبقى بتشتغل إيه؟! وبعدين لما سألته إمبراح قال لى: القوانين موجودة. وقلت له:

سرى للغاية

إحنا هنبت فيها بكرة، فقلت له هنستنى ليوم الأحد ويبقى أحسن إن احنا نتكلم هناك على أساس إن دا موضوع يمس الناس كلها، وإذا كان عندهم رأى لازم نسمعه.

مرعى: بالنسبة يافندم لقانون التعاون بالنسبة للانتخابات.

عبد الناصر: هو كان فيه كلام إمبراح، وكان اتكلم معايا لبيب على أساس مش عايزين الانتخابات قبل إبريل على أساس إن الناس هتبقى مشغولة، فأنا قلت له: يتصل بيك عشان تشوفوا هذا الموضوع على أساس التفاهم بينكم. وإحنا طبعاً لازم اللجنة المركزية واللجنة التنفيذية العليا يبقى لهم شغل، وبعدين اللجان المنبثقة عن اللجنة المركزية لازم نشغلها. والحقيقة يعنى أنا مش عايز أروح أنا أتكلم فى اجتماعات اللجنة المركزية، وإلا يبقى الموضوع ناس تسأل وأرد؛ لأ.. أنا عايز إن اللجان تعرض مواضيع التعاون والمواضيع المختلفة تتعرض على الجنة وتناقش.

مرعى: سيادتك أنا رأيت فى الموضوع يتماشى مع رأى سيادتك، وأنا مقتنع به تمام الاقتناع. إذا سمحت لى سيادتك أتصل بالدكتور لبيب شقير وبنعمل له مذكرة عن الإصلاح التعاونى وإصلاح التسليف، ومنها أيضا تحديد ميعاد الانتخاب. وبعدين المذكرة اللى بتقدم بتناقش فى لجان الاتحاد الاشتراكى وتناقش على مستوى اللجنة المركزية وبتعدل زى ما هم عايزين؛ بحيث إن هو الأسلوب ده اللى احنا ارتضيناه مع بعض.

عبد الناصر: وبعدين هم هيقروا، المعقول يعنى أنا رأيت الحقيقة بالنسبة للجنة التنفيذية العليا والاتحاد الاشتراكى وبالنسبة للجنة المركزية، هم لازم الأول بتقروا السياسة وبعدين بتيجى هنا فى مجلس الوزراء تنفذ؛ لأن الحقيقة الأمور هتبقى مقلوية لو إحنا مشينا بمجلس الوزراء الأول وبعدين نوديهها هناك، طب إفرض هم موافقوش فى اللجنة المركزية عن الموضوع؟! فالوضع الطبيعى إن العمليات الخاصة بالسياسة بتروح اللجنة المركزية واللجنة التنفيذية العليا وبعد كدا يبقى سياسة يتفق عليها. التنفيذ فيبقى الموضوع سهل جدا ومحدث يقول ليه عملتوا الشئ الفلانى أو معملتوش الشئ الفلانى، وأنا بعتر إن من صالحنا أيضا إن عملية السياسة إن احنا بنناقشها على جميع المستويات؛ خصوصا بالنسبة للزراعة وأيضا بالنسبة للتعليم.

سرى للغاية

البرلسى: هم نقطتين بعد إندك يافندم، النقطة الأولى: زى ما حضرتك تفضلت عن التقرير بتاع الأخ الدكتور حلمى مراد تنفيذى مش على متابعة البيان نفسه، وأنا بأسأل: هل ممكن فى تقارير المتابعة ناخذ فى الاعتبار قرارات المؤتمر القومى بالمره مع دا ولا لأ فيه حاجات مش وارده مثلا هنا؟

عبد الناصر: إحنا مدين اللجنة التشريعية من الأول متابعة بيان ٣٠ مارس ومتابعة قرارات المؤتمر، وماشيين أظن فى هذا ويحدث كل المواضيع فى الاجتماعات لمدة شهر.

البرلسى: يعنى التقارير اللى هنبعتها بعد كدا للأخ حلمى خاصة بس بالبيان التنفيذى بتاع ٣٠ مارس؟

عبد الناصر: آه.. وأنا الحقيقة اخترته هو لأنه قال ٩٩,٥%! (ضحك) يعنى لازم أحمله المسئولية، لأنه لازم يخلى لنا ٩٩,٥ دى صفر وييجى يتكلم بعد كدا ويواجه ويقول. (ضحك)

البرلسى: وبالمناسبة دى هستأذن فى كلمتين هنا بخصوص التعليم العالى، هأخر إرسال أى بيان للأخ حلمى لأن أول نقطة خاصة بسياسة التعليم العالى، وهانتظر زى ماسيادتك تفضلت لما تعرض هذه السياسة وتقر عشان المتابعة، هتكون بعد بدء التنفيذ مش قبل بدء التنفيذ سياسة التعليم العالى معروضة، وسيادتك قلت برضه هتعرض على الاتحاد الاشتراكى.

عبد الناصر: كان فيه كلام إمبراح على تفسير فى القانون لبعض ناس اللى متعينين فى الجامعات، القانون دا موجود فى دلوقتى؟ وأنا قلت لبيب شقير يتصل بيك قبل ما أمضى.

البرلسى: حاضر هشوفه.

النقطة الثانية: أنا أتمنى إننا نرفعها لأن تنفيذها فى منتهى الصعوبة كمبدأ عام، وهى تحديد أعداد المقبولين بالكليات الجامعية والمعاهد العليا على مستوى الشعبة الدراسية وليس على مستوى الكلية أو المعهد. دا رأى أثير قبل كدا لكن الناحية العملية أما مثلا أنا هأقبل ١٠٠ طالب فى كلية الآداب قدموا رغباتهم بالبطاقة إياها دى حسب رغباتهم، صعب قوى عمليا إنى أقول: هأقبل كام من القانون الأول خالص شعبة الآثار وشعبة التاريخ وشعبة اللغة العربية، والطالب يبقى عنده ٧٠ رغبة يكتبهم فى البطاقة؛ فتنفيذ هذه الرغبة أو الرأى

سرى للغاية

هيكون صعب عمليا جدا، وده كفاية قوى كذا إحنا ماشيين بالطريقة اللى ماشيين بيها لحد دلوقتى.

مراد: إذا سمحت لى سيادتك أقعد مع الدكتور البرلسى.

عبد الناصر: أو تتبادلوا! (ضحك)

أصوات: (ضحك)

مراد: الموضوع اللى أثاره الأستاذ الدكتور البرلسى مهم جدا، لإن احنا بنصادف حتى فى التربية والتعليم مش بس فى التعليم العالى مشاكل فى تدريس اللغات الأجنبية مثل الإنجليزية والفرنساوى، لما بنيجى نعين الخريجين من كليات الآداب كان مدرسين الإنجليزية أو فرنساوى مايجوش يستلموا! يعنى إحنا عملنا السنة اللى فاتت عن طريق لجنة القوى العاملة خدنا حوالى ٣٨٠ واحد وواحدة اعتذر منهم أكثر من النصف! ولما جينا عملنا إعلان للدفعة الجديدة لم يتقدموا إلا ثلاثة اتنين منهم مجندين والتالته بنت! وبعدين عندنا نقص فى اللغة الإنجليزية، كلهم منتظرين إنهم يتعينوا فى السياحة وفى الخارجية وفى التلفزيون والإذاعة. وبنستأذن على نظام الشعب مهم جدا لأن لو قبلنا فى الآداب أعداد كبيرة وكلهم دخلوا قسم الاجتماع البلد مش عايزاهم، بينما أنا عايز فى قسم اللغة العربية وعايز فى قسم اللغة الإنجليزية؛ ففيه أقسام مطلوبة وأقسام غير مطلوبة.

عبد الناصر: برضه تقعدوا مع بعض.

البرلسى: معلىش دى تستاهل مناقشة بينى وبين الدكتور.

عبد الناصر: الساعة بقت تسعة وخمسة.

البرلسى: طيب يافندم خلاص نص دقيقة ولا خلاص يافندم؟

عبد الناصر: لا.. نص دقيقة ممكن.

سرى للغاية

البرلسى: أنا بختلف مع الدكتور حجازى فى موضوع اللجان الوزارية، يعنى صعب إن سيادتكم بتقول: إن الموضوعات دى كانت بتعرض سياسة عامة على المجلس مجتمع.

عبد الناصر: القوانين بتعرض ونقراها مادة مادة وده يعدل كلمة ويعدل نقطة، وابتدينا كنا بهذا الشكل أظن إن هذا النظام كان متبع فى المجالس.

البرلسى: فكفاية إن الوزير ببقى عضو فى لجنيتين، إنما كل اللجنة أو القانونى أو الاتفاق ببقى بين وزيرين بس؛ بيتهيالى ببقى الواحد بيستفيد أوى لما بيسمع ويناقش ويبقى على دراية بصورة كاملة بالنسبة لموضوع كتيره جدا تخص السياسه العامة.

عبد الناصر: هو أنا بقول: اللى عايز يقدم قانون الحقيقة أنا بعترض على كتر القوانين، القوانين كل ما بتكثر كل ما بتلخبط الدنيا زيادة. اللى عايز يعمل قانون بيجيب المبادئ اللى مبنى عليها القانون بنناقشها فى مجلس الوزراء ونوافق نرفع القانون. اللى بيحصل النهارده كل وزارة كل يوم أى فكرة عند وكيل الوزارة عند ده عند ده بيجى الوزير يمضى أو بيعت اللجنة التشريعية، وإحنا مش عارفين إيه القوانين الحقيقة اللى رايحة بهذا الشكل. كل ما بتكثر القوانين أنا من رأى بيحصل خلل فى العمل ما بيحصلش انتظام فى العمل؛ فإحنا نحاول نحد من القوانين اللى موجوده دى، وياريت نغير اللوائح.. اللى أنا بطالب بيه اللوائح بتاعة وزارة الخزانة وبتاعة وزارة الصحة لو نغير هذه العمليات اللى بقالها عشرات السنين هى دى العقبة اللى بيشتكى منها الناس، وبرضه ده موضوع طلبناه مئات المرات ولم ينفذ. وأنا برضه قلت لهم وقلت للدكتور حجازى أول ما جه: إن الأجهزة هتطلع أقوى من الوزراء؛ لأن الوزير هايجى هيفتكر إنه قوى جدا وإنه يقدر يمشى الجهاز، لكن الجهاز بعد كام شهر بيخلى الوزير يتأقلم وبياكله!

حجازى: لا.. العكس اللى حصل يافندم.

عبد الناصر: واكلهم إنت يعنى؟! (ضحك)

أصوات: (ضحك)

سرى للغاية

حجازى: هو الصعوبه دلوقتى فى التغيير يافندم، أنا وكيل الوزارة دلوقتى زعلان لأنه هيتقل من الأوضه! هى وصلت الدرجة يعنى الى إن محدش منهم عايز يغير مكان أو مكتب! وزارة الخزانة دى أنا بادى مثل لمجرد إن أربعة وكلاء اتحركوا حركة لولبية كده! ولاّ الأماكن يافندم، سيادتك لا تتصور عدد الشقق المشغولة من الموظفين خارج مبنى الوزارة، متناثرة.. حاجة غير معقولة! أول هزة عملتها هو إن التنظيم جديد نص الوزاره فقط، لأن الوزارة على قسمين. مجرد تغيير المكان وتغيير الموظفين دى عاملة وش جامد. وبعدين: فصل الجهاز الادارى عن القطاع العام علشان العقلية نفسها يافندم.

عبد الناصر: هو الحقيقة اللوائح اللي عايز كذا إمضاء واللى عايز كذا، كل ده لو الحقيقة غيره. يبقى الجلسة الجايه هنتكلم فى قوانين التعليم، يوم الأحد تكون خلصت مع عبد المحسن اتفقت معاه برضه على أساس نتكلم فى موضوع النقل لأنه لازال يشكل أكبر مشكلة فى القاهرة النهارده وهى كلام الناس، والنهارده الدكتور مراد بيقول: إن اللى إنت عملته إيه؟! (ضحك)